


楓山章先生集

五





楓山章先生集

(五)

章懋撰

楓山章先生集卷之六

墓表 九篇 附行狀 二篇

竹居處士董君墓表

杭之海寧有樂善好施之士曰董君如魯。其以竹居稱者。君所自號也。曰處士。則不仕而有其德也。君嘗以入粟授承事郎矣。不書。非其志也。君生永樂己丑。而卒於成化之丁未。得年七十有九。卒之日。其鄉之人哀悼之者。若應山之於運處士焉。則行爲可知已。其嗣子謙。以歲之十二月七日。葬君南山之陽。而使其孫松。奉前禮科都給事中知汀州府張君靖之所爲事狀。丐予文以表其墓。予謂張君位居法從。文擅一時。其言足以信今傳後矣。尙何取於予之鄙陋不文者哉。辭至再四。而松固請不已。以爲匍匐數百里而來。不得一言。無以復諸其父。予不得卒辭。則一惟張君之狀述焉。按君諱慧。如魯其字。姓董氏。其先大梁人也。宋建炎初。有諱汴者。以武功大夫扈蹕南渡。賜居於杭。其子臨安司法信。又徙海鹽之澈川。歷五世。至君之高大父仲貞。通經術。負材氣。慨然思用世。而遭元之亂。遂隱於海寧之泉山。曾大父思廉。大父彥和。父壁。號坦菴。皆隱弗仕。而積德累善。用昌厥家。此君之世。令有開於其先者也。君娶徐氏。先卒。生子二人。其嫡卽謙。庶曰讓。女二人。其婿曰祝滄。周輦。孫男三。松。梅。檜也。曾孫二。未名。此君之流慶有衍於其

後者也。君爲人悅詩書，悖禮義，政成於家，而行儀於鄉。有君子長者之風，嘗爲祠堂以奉其先，而器制必備，省謁必虔，享祀必豐。凡有事，非齋戒不入也。爲終慕堂，以致思其親，而朝於是，夕於是。羹墻如有見也。爲家範數十條，以訓其子若孫，而凡疎戚子弟有失道者，亦必諄復教戒，使之悔悟而後已。此孝敬慈愛之行，其家者也。其贍三族之貧乏，與孤寡者，有義田三百畝，勸節田六十畝焉。備里社凶荒，有周急田三百五十畝焉。貧而病者，月給之米，死而弗能斂者，助之棺，無所歸者，則葬之。義塚與凡涉者，有橋。汲者有井，無慮若干所。人莫不歸其德焉。此睦鄰任恤之施于宗戚鄉黨者也。其在景泰甲戌，浙西饑，輸穀四百石，在成化癸巳，海溢民流，輸穀六百石，皆以助有司之不給。例授承事郎，力辭不受。至丁酉而饑甚，又輸之千石，有司以爲君賜不可重違，給之冠帶，乃強受之。然亦不常服也。其後又請入粟千石，以爲荒備。且嘗葺治其文廟學宮之頽敝者，以崇教化。縣令孫剛，義之，旣以賓於鄉，飲仍列其行誼以聞。此又其效忠於國者然也。君嘗北遊姑蘇，謁文正范公之祠，而得其遺文。南至浦陽，訪鄭義門，而得其家規。與朱子家禮歸而刻之家塾。又欲趨闕里考亭，以瞻聖賢之遺風而未果。則其所志，又不但如是而已也。臨終時語謙曰：吾平生力于爲善，尊禮賢士大夫，不敢少自怠者，欲成汝兄弟以永其家也。吾所爲家範，有未盡者，其損益行之，所藏遺書及所置勸節周急義田，吾志與事三者具矣。爾尙踐脩厥猷，續而述之，毋庸不篤。以辱亡人，吾目瞑矣。謙泣而受命，則所以薰其後者，又無所不至也。嗚呼！古大司徒以三物教民，而賓與者有六行焉。迹君所爲，庶其近之，非其材質之美，有過人者，能若是耶？使得聞聖賢之學，而擴充以盡其

才焉。則其所就可量也哉。君爲一布衣。而德善在人。彰彰若是。使得其位而施焉。則所及者。奚止一鄉一邑之間也耶。若處士者。其亦可謂三代之遺民矣乎。吾是以表而出之。將使世之富不仁者。聞風而知所媿。而貴有位者之膏澤不下於民。尤有愧焉。寧獨俾其子孫之弗隕也哉。

處士陳君原深墓表

邑士之秀者某。嘗爲予言東陽有陳中夫者。與其弟昉。居喪而廬於墓。予聞而嘉之。以爲當世降俗薄之餘。而有是焉。可不謂之孝矣乎。已而中夫昉。手錄其父處士君之行。走予所居山中。拜且泣曰。先人力於爲善。圖亢厥宗。不幸生弗耀於時。諸孤又皆鄙劣。不克自振。無以光昭其先。罪莫大焉。今旣葬矣。願辱一言。以發潛闡幽。庶幾死有聞於後。猶不死也。惟先生哀之。予惟東南文獻之邦。稱吾婺爲最。婺之東陽。故多衣冠望族。由宋以來。有所謂五府三大宅四名門者。皆以詩書禮義世其家。是固君子所樂道者。若路西陳氏。蓋大宅之一。而處士其陳氏之良也耶。予雖不及識之。而雅喜中夫之能孝。義不得辭也。按狀。陳氏出太邱之後。當劉宋時。有諱元寶者。始自開封來徙。在梁則合浦太守脩。以政績著。在宋則南劍州都巡檢使仕澄。兄弟遭方臘亂。以倡義有聞。其子德高。又嘗斥田千數畝爲義莊。以贍貧活族。有范文正公之風。陸放翁實爲記之。厥後以文武舉。登顯仕。秉州廳。綰縣章者。相望也。至處士之高大父侍道。又自路西別居官橋。及曾大父壽翁。大父居正。皆有鄉行。父迪。傳明毛氏詩。善吟咏。有詩若干什。藏于家。亦隱弗仕。母郭氏。處士諱垠。原深其字。質良行淳。忠信樂善。孝於親。豐於祀。友於其兄弟。而又能勤儉裕於而家。

以義方淑其子孫。以雍睦仁恤之行。善於宗族鄉黨。嘗爲租稅長。每戒子姪。毋瘠人肥己。輸官莫敢多賦。於民里有忿不平者。必就處士求直焉。正統乙巳。括寇之變。邑里騷然。處士固結鄉民。寨於洋溪山。寇不敢犯。卒用無虞。居傍柳溪。故有橋而圯。涉者病焉。處士爲石梁以濟。又作石陂於其上。溉田千餘畝。人多德之。其爲善類如此。成化丁酉十一月二十八日。以疾終於家。距其生永樂丙戌十二月十有九日。得年七十有二。厥配李氏。其生也。相處士無違德。其歿也。先處士七年。有子四人。長曰初。先卒。次卽中夫。次昉。次敖。皆克家。孫男四。曰潭。球。廷。相。贊。而潭進士。有聲庠序中。女三。長適金某。餘未行。曰杲。曰旦。則曾孫也。中夫等以其卒之。又明年己亥十二月十日。奉柩窆於路西郭園山先隴之左。禮也。嗚呼。陳氏之世德尙矣。以處士積德累善。用昌厥家。固有足亢其宗者。雖訖以布衣終。弗享其盛。然有中夫爲之子。承之以孝。以潭爲之孫。明經修行。以有待其來。蓋未可量。傳所謂必復其始者。將不在於是耶。故爲表其墓以俟。

柏軒處士艾君太康墓表

大行人劉公麟。曩舉進士。上春官。道經浙右。過予所居山中。相與論易。其門人有艾生茂者。從之行。予嘉其俊敏。可與共學。劉公爲道其父太康之賢。而未暇識也。今年夏。生忽衰經踵予門。持其鄉人陝西憲副周公模所爲事狀。拜且泣曰。先人力於爲善。篤於教子。圖亢厥宗。不幸志未及酬。而溘先朝露。不肖孤。弗克自奮。以顯揚其親。罪莫大焉。願賜一言。以發其潛。庶幾死而不泯。以少慰於九原也。予旣未獲面君。又素不文雅。其何以爲言哉。謝數四。而生之請不置。以爲匍匐數千里而來。不得所請。無以爲歸。予悲其志。

弗獲卒辭。乃按狀而述焉。君姓艾氏。諱玉。其字太康。別號柏軒。臨江新淦人也。高大父庭芳。元寧都知州。曾大父汝器。大父宜同。皆潛德弗仕。父欽。號敬齋。嘗游太學。有名聲。仕可階矣。而以親老辭歸。母王氏。君幼有美質。誦詩屬對皆過人。比長而善治生產。敬齋授以家政。闔門千指。衣食之需。吉凶賓燕之具。皆取給焉。君明計然之術。修猗頓之業。往來兩浙間。未幾而費用大饒。剏園池。新居第。奉先有祠。延賓有館。靡不完美。可謂克家者矣。君雖不及於學。而天性孝友。上事四親。咸得歡心。從父璋。瓚。與弟文康。客死於外。皆不遠數千里。歸其柩而窆之。鞠其弟之二孤。無異己出。有女弟之子。早失怙恃。亦爲撫而教之。俾有成。立處宗戚鄉黨。則恤貧字孤。周其死喪疾病。與凡橋梁津渡之理。皆不吝所費。人多德之。嘗念其父敬齋。翁志於學而未遂也。有子茂。教之爲士。延明師良友與之處。厚其資給。責以成人。見其能明經應科。則爲之喜曰。是殆能終吾祖父之志乎。其所爲類如此。弘治丙辰三月。以疾終於錢塘之寓舍。距其生宣德庚戌。得年六十有七。君娶楊氏。生一子。三女子。卽茂也。女適劉芳遠。蕭國勝。其幼未行。孫男一。曰玄禎。孫女三。俱幼。以某年月日。葬于其縣某鄉某山之原。嗚呼。治生能富。用財能義。教子能儒。若艾君者。其亦可謂鄉之善士矣。然究其所志。則不止於是焉。所以大君之善而成其志者。將不在於茂耶。故爲表而出之。以示其後之人焉。

耕雲處士董君墓表

自予謝病歸田里。餘二十年。里少俊多。辱與游。予取古人爲己之學。若大學之敬。中庸之誠。論語之操。存

涵養。孟子之體驗充廣者。與之商確而從事焉。往往以爲非進取所急。有厭棄而去者。獨董生遵數輩。以予言爲可信。過從最久。故其學講究必精。操履必謹。發於文詞。不求合主司。而求合於經。不求通時好。而求通于理。用是累舉不偶。而志不少變。予愛之重之。意其必有所自也。今年春。遵忽狀其父處士君之行。而告于予曰。孤不孝。弗克自奮。以顯揚其親。爲罪大矣。今先人歿且二紀。墓木旣拱。而墓石未有刻焉。深懼先德日就湮微。愈重不孝之罪。惟先生哀而賜之一言。使後世有見焉。則遵雖爲明時棄物。無憾也。予與君雖同鄉邑。而未及一識其面。將奚以爲言哉。然於遵則不容默默也。乃按狀而述焉。董爲吾邑著姓。其先有居望雲鄉者。爲八行先生師仲。在宋宣和中。以孝義有聞。而居蘭陰山。爲教諭先生心傳。嘗從禮部吳公游。在國初時。以文學知名。蓋君之六世族祖也。君諱華宗。字克振。別號耕雲。曾大父叔良。大父子材。皆有鄉行。子材始自蘭陰。別居東湖。故今爲東湖人。父孟暘。母陳氏。君雖不及於學。而天資孝謹。事其母。油油翼翼。凡可以悅心志。適口體者。必竭力營致。雖老弗懈。事其兄。如事嚴親。不敢專所行。不敢私所。有。母視其嫂。子視其姪。莫或間言。雖至析爨。而友愛不衰。外而族姻隣里。以及嘗所與游之人。靡不得其。懽心。凡歲時會集。與賓客往來。必豐其具。而不計窮空。有假貸不能償者。不復問也。愛其子遵。不使之勤。生治產。以隨俗謀利。而教之爲士。年方羈卯。卽遣入邑庠。求明師良友與之處。縮衣嗇食。以資給之。期以大振厥宗。惜其學未就。而君弗能待也。卒於成化甲午三月二日。壽五十有二。葬所居甘棠鄉新豐里東湖之澚。應村之原。則其年之十二月九日也。娶城北杜氏。有賢行。子男一。卽遵也。女一。適江正。孫男女各

二其見於狀者如此。嗚呼！君雖浮沉里閭，不求聞達，而行修於家，善稱于鄉，教成於子，貽謀遠矣，而遵也。又能明經砥行，以揚君之休，其所就有未可量者。豈非韓子所謂蘊必發起而大者，將於是乎在耶？故書其大略，使揭諸封隧，以式其後人。

知府蒙菴黃公墓表

嗚呼！是爲吾表舅氏蒙菴先生黃公之墓。某自髫髻從公游邑庠，及舉進士，上春官，時公爲中書舍人，又館其室，公飲食之，警誨之恩，義兼至。蓋以某之先妣於公爲外女兄，有骨肉之戚，非但若他人之爲師弟者而已。某後備員翰苑，以罪出補外，不獲侍教，十有餘年。及公謝郡政，歸老于家，時往候焉。公接之，未嘗不懽然相樂也。公自治壽藏于所居之右葉園山，嘗挾往遊，命書其墓上之石。某以公方康強無恙，何以云及是耶？未幾而聞公寢疾，亟往省視，則已屬纊矣。時又適有召命，來官南雍，王事有程，弗獲朝夕撫臨，從執紼之列，羊曇之悲，曷其有極。今公之嗣子鄉貢進士溥，不遠千里，衰絰來南都，奉前進士靖江令鄭君某所狀行實，以公治命，促文其墓。某何敢以寡陋不文辭，而棄公平生之言哉？乃按狀而書之。公諱理，字廷璧，姓黃氏，別號蒙菴，世居蘭谿之純孝鄉。曾大父某，大父某，父增，字以益，以公貴。初贈中書舍人，繼贈南京刑部員外郎，母周氏，封太孺人。又贈宜人。公自幼穎敏不凡，刻苦務學，工舉子業，及詩詞古文，流輩莫及。尤善楷書，縣大夫以上，咸器重之。凡貴富家子弟入學，必師事焉。尤爲提學僉憲熊公暕所稱許。景泰庚午，以書領鄉薦，會試不偶，卒業太學，閒從翰林侍講周公洪謨游，造詣益精。又再上春官，皆不偶。

乃就吏部銓試。選授中書舍人。嘗建論中書之選。非進士舉人。不宜濫授。遂以爲例。又言時政十事。多見施行。成化甲午。陞南京刑部山西清吏司員外郎。又二年。遷郎中。其用法惟事仁恕。若于福章。曹忠。詹榮。輩皆死獄也。而必求其生。蓋有寧失不經之意焉。辛丑。陞福建汀州知府。郡多滯獄。若賴慶。李子榮。林綱。胡鎮。輩皆久繫不決。公以矜疑處之。所全活二十六人。吏民大悅。癸卯歲饑。既悉發公廩賑之。又以己俸百餘石。給其糒。獨無告者。仍規置銀六百兩。糴穀以爲后備。由長汀至上杭。歸化至府。相去皆三百餘里。殊苦接遞之艱。則奏以三洲玉華舊公館。改置馬駟。以寬民力。上杭之龍上。長汀之跋頭。皆有巨石突起。溪流中。鼓浪。務舟。則募工燒伐其石。以成安流。又建濟川橋。徙百步鋪。新兩學。櫺星門。增飾堂廡。及脩治街衢。百廢具舉。而費不及民。衆建嘉績亭。以頌其德焉。歲丙午。述職趨朝。過其家。適溥登鄉舉。乃喜而嘆曰。吾可以休矣。遂因入覲。而乞致其事以歸。汀民聞之。遑遑焉若失怙恃。至今猶見思焉。公長身美髯。體貌豐偉。慎容止。善談笑。閑居里第幾二十年。精神氣力。雖老不衰。其事上勤禮。凡遇聖節。及正至慶賀之日。必朝服之。縣庭望闕行朝會禮。不以祁寒暑雨有閒。其居家孝友。懷鄰里鄉黨。以恩遇親戚。故舊有禮。嘗以俸餘白金。分惠宗族之貧者。有老友王以彰。去官貧困。則頻周其之。且禮貌之不衰。上自達官貴人。下而田夫野老。無不得其懽心。所謂樂只君子。德音不已。固宜其黃耆台背。而眉壽無疆也。忽一日。門外牌坊石梁斷裂。公知非祥。乃謂溥曰。誤爾禮部之行矣。已而疾作。遂以弗起。弘治癸亥六月二十二日也。距其生永樂戊戌。得壽八十有六。娶李氏。有賢行。相公事舅姑。理家政。甚得婦道。初受封爲孺人。進封宜。

人先公四年卒。壽七十有九。厝於公所治葉園山壽藏之右。至某年月日。乃舉公之柩而合葬焉。子男二。庶長曰洎。冠帶義官。次嫡卽溥也。女二。壻曰祝某。徐某。孫男若干。孫女二。長適俞某。次適郭琪。其所著有蒙菴詩文稿。及雜稿若干。藏於家。昔孟氏以爵齒德爲天下達尊。世之君子。兼是三者。固鮮矣。而洪範之五福。能備而全之者。不尤鮮乎。今公位專城之貴。累千金之富。而德政在人。至於請老而歸。年躋耄。康強無恙。以考其終。則三尊五福。咸萃一身矣。而溥爲之子。明經修行。以繼世科。是爲克昌厥後。而其福又有加焉。公之得於天者。若是其厚。其必有以取之。得非中庸所謂栽而培之者乎。是用表而出之。以示其後人。俾知所以崇德而象賢哉。

按察使姜君墓表

正德丁卯夏五月甲子。河南按察使姜君終於家。以某月日葬於其鄉甘露里余村之原。僉都御史海陵儲公。旣爲誌於幽堂矣。其嗣子鄉進士清。又以昔在太學。嘗從予游。又奉廣西方伯舒君某之狀。衰經來拜。乞表其墓。予以耄荒不文。辭謝不能。而清以君治命固請不已。予雖不獲識君。而舒君非阿所好者。乃按狀而書之。君諱綰。字玉卿。姓姜氏。廣信弋陽人。大考度。爲德平訓導。考璧。母汪氏。君生有至性。五歲失怙。悲泣如成人。稍長。能自力於學。德平奇愛之。嘗樵採以供母。暇輒誦書不輟。後終母喪。游學莆田。業成而歸。第成化戊戌進士。授景陵知縣。至則決滯囚。去豪猾。修復義河。開陂築堤。以興民利。又新廟學。設鄉校。祀鄉賢。教民婚喪以禮。而革其陋俗。以治最聞。拜南京河南道監察御史。抗直敢言。不少顧忌。嘗陳治

道十事。及論午朝宜及大政。又論大臣之規起復。及玷物議者。衆皆側目。有權貴擅侵蘆蕩之利。君率同官九人。合辭論其十罪。反爲所誣。諸御史皆落言職。出補外。廷臣交章奏留。不可得。而九人聲望。遂重於天下。君判桂陽州。不以遷謫渝其志節。益究心民隱。治如景陵。上官重其能。凡諸郡有大訟疑獄。必以屬君。而大治。闕令檄君往治。皆有惠於民。遷寧國府同知。僅及三年而去。亦有治績。民爲立去思碑焉。擢知慶遠府。其地邊夷。君不鄙夷其民。而建儒學。課生徒。以興文教。治樓櫓。閱民兵。以修武備。民獠改觀。先是客舟由柳江抵慶。必假哨兵護行。兵官遂以爲利。君一日自會府。遡江還郡。諸客舟皆隨以進。賊憚其威名。不敢犯。自是舟行無復用哨矣。蠻酋韋七旋。韋萬妙。久爲寇暴。總戎者不能討。君悉以計斬之。七旋之黨。合諸洞賊衆數萬。來攻城。君先約束四鄉民兵。令賊至。且勿與交鋒。宜據險以待。乃部署吏民。乘城拒守。賊進穴城。城且潰。君募敢死士擊穴城者。殺數十人。已而四鄉兵至。合攻大破之。斬首二百餘級。追奔數十里。威震南蠻。而東蘭等州侵地皆歸。右都御史劉公大夏。謂君有文武材。薦爲廣西按察副使。提督右江兵備。乃別廉貪。決疑獄。練將士。繕兵甲。實倉儲。完城堡。凡羣賊出沒二郡者。悉討定之。思恩岑濬。擅興戎旅。襲破田州。遂其知府岑猛。放兵四掠。君疏其罪。有詔會兵征討。而遣君先往撫諭。濬不受命。狂悖益甚。遂請總兵會討。而時已有疾。輿疾統衆抵其城下。與諸將分道來攻。賊戰敗。走保舊城。其黨悉潰。濬勢窮自盡。而積年逋寇。一旦盡平。以猛始釁。復拘之武緣。君因上疏。請以思田二州分設州縣。改建流官統治。勿使夷種得專士民。庶幾用夏變夷。而患可息。條具建置事宜。上聞。朝議多是其言。已而劉公去廣。

羣論不叶。弗克悉如所志。君遂以疾乞歸弋陽。已而吏部復奏起君爲河南按察使。到官未幾而舊疾復作。疏乞謝事。抵家數月而卒。得年僅五十有二。君天資果毅。膽氣絕倫。而勇於有爲。其居家孝友。恆以祿不逮養爲憾。而事二兄尤篤恭愛。居官以儉素率下。視官事如家事。與人交有終始。處事必盡人謀。臨變劇辦治不撓。其用兵身同士卒甘苦。不用鄉導。而豫圖山川村落道路所由。故兵行而人莫能測。不調兵食。而令土兵自持糗糒。有獲卽分給之。故人樂效死。而所至有功。君配周氏。善事君子。德音不遠。子男三。長卽清。次曰濟。蚤卒。季曰泓。女二人。裴樸。陳誥。其婿也。昔漢張綱爲御史。嘗埋輪都亭。條列梁冀兄弟無君之罪十五事。京師震竦。後雖爲冀所中。而出守廣陵。又能化服劇賊數萬。南州晏然。非其昌言立朝。威望有素。能致然乎。今觀姜君南臺十罪之章。聲聞朝野。庶幾亦有綱之風焉。則諸處治民之最績。廣南破賊之奇功。特餘事耳。使當大任。而悉行所志。又豈不足以服蠻寇而息邊患耶。若君者。亦可謂國之勞臣矣。故爲之表。以示其後人。俾知所以崇德而象賢哉。

文山先生吾君墓表

吾友文山吾君。以弘治甲子九月六日。考終於家。明年十二月十日。葬於其鄉溪盤浦之原。其子中書舍人騫。旣書其世冑履歷。生卒歲月。刻置幽堂矣。迨免喪。而舍人與其弟進士翕。來見。以狀授予。乞表其墓。予之辱游於君。最故而知之深也。誼弗可辭。第以耄荒不文。而又遭子與孫之戚。久弗克爲。今年夏。舍人復自京以書來促。乃按狀而書之。君姓吾氏。尋名景端。其字別號默齋。世家開化之文山。其父慎齋。司訓

長垣時。生君於學宮。幼有異質。敏悟絕人。八歲能咏詩。達官長者。皆以成人禮之。比長而侍母於家。治生之暇。不廢講學。初治書。及左氏春秋。既乃受易於僉憲方先生泌。所作易義。多所發明。方深器之。以女弟妻焉。天順己卯。魁薦。予以癸未會君京師。與之論易。造詣甚深。而責善輔仁。尤多裨益。始定交焉。後入太學。與安福劉箴景元。四明楊守祉維立。爲麗澤之會。聲譽甚都。一時士大夫咸慕與交。貴游子弟爭從受業。莫不以倫魁擬之。既而劉楊皆進士。及第。位大僚。而君五上春官。俱不偶。人謂宜再需後舉。君曰。吾親老矣。可擇祿耶。竟就乙科。得教諭江浦。楊文懿公以文送之。曰。三釜足樂。萬鍾何加。景端奚趨。加人一等哉。爰迎慎齋之官。母夫人徐。以廢視。弗克偕。乃留其妻若子。侍養於家。其在江浦。嚴條約。以身率物。教人講學。爲文。娓娓不倦。而於禮義廉恥。孝弟忠信之行。尤惓惓焉。學東有隙地數畝。因其沮洳。鑿池種蓮。構亭其上。扁以求樂。且因以自號。每侍慎齋遊息其間。胸次灑然。有吟風弄月之趣。蓋欲示人以周程之學。而諸生未有能得其意者。時定山莊孔易。謝病家居。日來亭上。淪浹道德。商確古今。相樂也。且爲記焉。其學宮文廟隘且圯。欲改作之。一勸募間。上下樂助。不費公帑。而輪奐一新。其所施爲。知急先務。而能感人類如此。上官之賢者。皆以爲有道。賓禮之。御史大夫戴公珊。爲御史。提學南畿。知遇尤深。湖廣江西。皆聘司文衡。而崇雅黜浮。時號得人。居數歲。慎齋以桑梓爲念。因奉以歸。還復之官。每鬱鬱不樂。作籠鳥賦。以見志。適有持憲節者。責其逢迎。以貴勢臨之。歸志益決。又以長子喪。乞歸養。當道重其去。欲留之。獨御史留君謹。謂君之歸。係風化不小。慨然從之。既歸。而父母年皆耄耄。朝夕左右。志養不違。或具壺觴而燕適。

侍杖屨以徂。祥親心無不豫。及二親相繼以壽終。自殮至葬。一以朱子家禮從事。雖老而猶毀瘠。雖久而哀不忘。人以爲難。縣令欲以孝行上聞。力沮止之。與其弟暕。怡怡相樂。終始無閒言。其族蕃大。則追復遠祖祀田。歲時祭掃。爲宴集胥訓誥。以聯合之。有貧乏。則加以周恤。鄉鄰有忿爭不平之訟。皆化息焉。其治生則種粟插杉。爲終焉之計。日以詩書課其子姪。無一毫外慕意。獨每聞邊患。及郡邑旱潦。則憂形於色。見公家弊政。民所不堪。則憤懣太息。其爲學。雖不廢舉業。而志專爲己。嘗類集朱子讀書法。以存心主敬爲先。致知力行爲務。不溺於記誦詞章之習。爲文不事剽竊牽綴。無險怪華巧。惟以理勝。善筆札。尤精於草書。自成一家人得之者。如獲琪璧。歸自江浦。而家食者殆二十年。鄉邑子弟及四方學者。考德問業。戶履嘗滿。嘗書太極西銘。以示爲學本原。及舉管子思之思之。又重思之之語。爲窮理之要。又嘗謂學者曰。學貴有用。然須是養氣。氣充天下何事不可辦。故從之者。隨其方分。咸有所得。學者不敢道其姓字。皆卽所居。稱爲文山先生。令聞廣譽。日新月盛。工部主事林沂。刑部主事潘府。御史余廉。咸薦其才行。可大用。皆格不行。楊文懿公在吏部。欲用爲提學。亦不果。甲子孟秋。以慎齋忌辰。主祭少勞。重以傷感。遂寢疾不起。嘗曰。消息存亡之理。吾見之已審。卽死何憾。一日強起。索筆寫遺命數條。大約以耕讀爲業。忠孝爲念。喪葬勿徇俗爲禮。語甚切要。疾旣革。作一贊云。濁質濁氣。去物去蔽。一點靈光。依然尙在。命孫謹書之。語畢。命遷正寢而終。距其生宣德辛亥。享年七十有四。娶方氏。行人司正瑛之女。甚有婦道。克配君子。子男三。長獅。早卒。次卽鬻。由文安教諭。第壬戌進士。授今官。季翁。第戊辰進士。今知長洲縣。女二。汪深。孔憲。

其婿也。孫男八，曰謹、誼、謹、誠、譽、諷、審、誘。其所著有五箴解、朱子讀書法、周易傳義會同等書。所謂詩文有太學、江浦、還山三稿，藏於家。其世繫本末，具予所述慎齋墓誌。而羣行之懿，備於門人方豪所狀者。茲不悉著。夫以君之所立如是，而終不遇焉。其殆天之未定，或者將以啓其後耶？乃爲之表曰：嗟嗟吾君，其學爲己，其仕爲親，有卓其行，有蔚其文，人之所惜，何蕃劉賁子之所志。茂叔伯淳，求雖未至，志則已勤。祿位弗逮，不顯其身，經術有貽，不亡者存。聲聞奕奕，子孫振振。一時之屈，來世之伸。吁嗟乎吾君。

荆溪處士張君墓表

正德己卯正月丙子，荆溪處士張君，以疾終於家。其冢嗣工部主事大輪，衰經踵予門，拜且泣曰：先君力於爲善，篤於教子，期以大昌厥家，而不肖孤，驚劣無似，不能有所樹立，以顯揚萬一，爲罪大矣。今不幸遭罹大故，攀號不逮，發引有期，而墓石未有刻文，愈重不孝之罪，敢具事狀，丐一言以發其潛，使先君德善有聞於後，則雖死不朽矣。惟先生其念之。懋謝以菴荒不文，不足辱命，而工部固以爲請，弗獲卒辭。乃按狀而述焉。君諱輔，字公佐，別號荆溪。其先汴人。五季時，有爲吳寧縣令諱潮者，肇家於邑西之托塘。其始祖也。吳寧後改東陽，故今爲東陽人。在宋中葉，有舉八行不起，賜號冲素處士，曰志行者。其十五世祖也。曾大父曰原仁，贈禮科給事中。大父曰福，屢出粟濟荒，賜官不受。父曰昂，有隱德，嘗厭城市喧雜，卜居城南之荆浦，而君生焉。母陳氏，君自幼穎敏解事，剛果有爲。其讀書務爲有用之學，嘗取經傳之切要者，熟誦於心。又取格言之有益者，悉書牆壁。其論事不爲無稽之言，或隨事而辨析其理，人莫能及。或因事而

逆陳利害。後皆有驗。其父常語人曰。此子器識不凡。必能大吾家矣。比弱冠。居父喪。雖哀毀瘠甚。而經理喪事。皆克如禮。其母寢疾。踰七年。而抱持臥起。供餽甘旨。無不順適。或掖扶就廁。而親滌溺器。亦不以爲勞。及母歿。哭踊垂絕。自殯殮營葬。以及虞祔歲時諸祭。悉依家禮。不作佛事。几筵上花瓶中插梅一枝。後忽吐花成實。人以爲孝感。其處兄弟友愛中。不忘規正。伯兄嘗加以非禮。則引咎自責。卒致感悟。其侍兄疾。恆以手取其便之結。不憚其穢。治兄之喪。亦如送親之終。而務盡其禮。及二兄繼歿。撫育二孤。無異己子。有長而破其產者。泣而責之。仍爲經紀其家。此其孝友之行於家者也。其治家嚴肅。內外斬斬。而教訓諸子。欲其敦本務實。知稼穡之艱難。言行不容虛妄。服食不許華侈。或交非其人。痛加禁絕。使大輪爲舉子業。課責尤嚴。或從師遠遊。則勉其刻苦有成。又曰。窮通有命。而學業成否。則係於己。又曰。人願立身何如。古之負重名於世者。未必皆享榮祿者也。及其登第後。欲乞歸省。則以書止之曰。汝旣出身事君。當鞠躬盡職。能有所立。光我多矣。奚事於定省乎。旣而宦食南都。復以書教之曰。作事須令後可傳述。又宜保全名檢。勿苟慕富貴。他書往往類此。未嘗一及於私。此其愛子之教以義方者也。其處宗族。恩禮周至。有不給者。助之。在尊行。尤加禮敬。有老而無以爲生者。則倡率族人之富者。月給其食。死則爲衾棺葬之。族衆聞有違言。則以大義正其曲直。聞者心服。子弟有乖禮法。面責勿貸。有取非其義者。皆畏君知。亟償其直。或卽以歸之。有取祖塋邱木者。皆與衆議罰。以所罰之財。歸之公堂。積爲修理祠塋之費。而衆知所警。親戚鄉黨。有不相咸者。一言勸之。莫不釋然。幼嘗師事里中陳元。至老不廢師禮。平生輕財樂施。賒貸未

嘗計息貧。則不責其償。隣里有疾者。必爲之求醫。死喪則視其所乏而周之。葬埋無所者。與之以地。有胡某者。家數口。疫死殆盡。皆爲之醫。且葬焉。平日雅尙斯文士。經其里。必延而賓之。館留累月。無怠容。邑令舉君長稅役。衆皆於稅外科取穀麥。爲執役之費。君獨無所取。又委君剖直民訟。亦不受報謝。君嘗謂死生禍福。任其自至。命卜師巫。惑人爲甚。皆屏絕之。不使及門。此又其睦嫻任恤之施於鄉邑者也。一日忽以書語大輪曰。吾終老諸事已備。但欠汝一面耳。時工部以秩滿將奏績。遂取道急歸。歸拜牀下。見君容色異常。不勝悲戚。召醫請禱。靡所不至。病日加劇。疾旣革。揖諸親族告訣。語諸子曰。吾素不惑異端。汝毋以浮屠治吾喪也。言訖而逝。君生天順己卯九月丙子。至是歲又爲己卯。得年適周六十。其配厲氏。同邑名家女。有賢行。善事君子。德音不遠。生四丈夫子。長卽大輪。正德甲戌進士。爲工部營繕司主事。次大輶。大輶。大輶。女一人。適同鄉何坊。孫男六人。應奎。應詔。應辰。應文。應祿。應祥。孫女二。大輪等將以再明年二月十九日。奉柩厝於興賢鄉寶山之原云。予於荆溪雖未獲一面之識。而雅善於工部。世稱不知其父視其子。觀於工部之賢。飭躬厲行。勤學好問。而志於求道。不肯苟同於俗。非有得於義方之教。而養之有素者。不能。則君之德。善淑於其家者。可徵。而其他羣行之懿。表儀于鄉邑者。亦可推而知矣。若荆溪者。豈非所謂一鄉之善士。而庶幾三代之遺民矣乎。故爲表而出之。以式其後人。若乃立身行道。流芳百世。以大顯乎荆溪者。則在于工部。而區區不斐之言。曷足爲輕重哉。

陳府君繼芳墓表

侍御陳君元習狀其曾大父繼芳府君之行。而以書介其友東湖董道卿來謂予曰。某不孝。曾大父既歿。且葬八十餘年矣。而墓石未有刻文。累世之積鬱而未章。爲之後者無所逃罪。某自童丱。讀祖父遺書。卽思所以顯揚光大之。乃今雖叨末第。從六察之後。而乏濟時之具。不能樹勳揚休。以光昭其先。朝夕思念。願得執事一言。爲之表章。使前人德善有聞于後。以少逭不孝之罪。是所望也。予謝以庸耄不文。不足辱命。辭而去之。已而侍御欽奉朝命。出按雲南。道經敝邑。因介邑宰錢侯。枉過陋巷。復申前請。必欲丐言。以發幽潛於旣往。起永慕於方來。則吾曾大父雖死不朽矣。惟執事其哀之念之。隨以狀進。予辭不獲命。乃按狀而述焉。府君諱芳。字繼芳。姓陳氏。蘇之海虞人。自其曾祖伯陽。祖孟遠。父仲祥。世以仁厚相承。爲邑城望族。至君尤溫厚慈良。敦尙禮義。鄉稱長者。遭元季之亂。寇陷郡邑。衆皆逃匿。君與其父亦虛舍出外。兼治農末。克勤以儉。再植有家。迨及聖朝。削平寇亂。天下又寧。郡邑舉君總徵一縣租稅。君委身奉法。使民惟正之供。不以一毫自私。民皆德之。課入歲充。自洪武永樂。至於宣德。六十餘年。如一日焉。他若恤匱周貧。拯人所急。及興廢舉墜。皆力行不倦。邑中儒學頽弊。舉君敦匠事。而事事不苟。速有成功。其爲善可謂有恆者矣。君嘗於其家構堂五楹。有一巨蜂。來止中棟。衆蜂以千計。尾綴若旒。不及地者二尺。所餘蜂旋於外者。不計其數。人以爲瑞徵云。又嘗作重屋。積書其中。顏曰崇善。日游息其間。中歲後。悉以家政付其子。凡門外諸勢利之事。不復知也。有司行鄉飲禮。必延致爲上賓云。嘗自謂平生無非義之爲。子孫其殆有顯者乎。某年月日。以疾終于正寢。得年八十有八。葬于虞山東北麓。祝家嶺之原。本邑人爲之罷市。

送者踵相接也。君娶解氏，慈祥簡淡，好誦釋氏書。平生不御葷肉，生子男四，長叔維，克紹德義，以孝行聞。次叔綱，叔瑛，叔權，孫男六，曰穀，禾，積，穗，秩，穆，而積以子貴，贈監察御史，曾孫男十有六，曰某某，而察即侍御君，寰爲翰林檢討，其最少者也。觀狀所述如是，則府君之世德，既有開於其先，而遺澤又克昌於其後。身雖居市，不爲市道，而篤於爲善，不二其心，謂爲一鄉之善士，非耶？使其獲聞聖賢之教，而務學以修其行，則所就豈止爲今世之士哉？昔韓昌黎誌貝州李司法之墓，以勦爲其孫，有道甚文，而謂李氏之蘊必發起而大者，於是乎在。今侍御與內翰，皆府君曾孫，而學道能文，卽今日之勦也。陳氏之起而大者，不在茲乎？予淺陋不斐之言，不足爲輕重，敢誦昌黎之陳言，使刻諸墓上，以告於後之人。

行狀附

永平知府姜君行狀

君諱璉，字廷器，本姓徐氏。其先世家壽昌，再徙蘭谿之鳳林。至君之高，大父亦一翁者，婿于姜，子孫因冒姓焉。大父篤隱翁，積德累善，始昌厥家。父徽州府君，仕雖不顯，而廉慎有聲，所貽謀遠矣。徽州四子，君其一季也。天分極高，讀書不數過，輒成誦，不忘。講學爲文，度越流輩。景泰癸酉，以詩薦於鄉。天順庚辰，登王一夔榜進士第，授山東寧海州知州。蒞政勤敏，纖悉必親，其興民之利，以耕桑多寡爲賞罰，而惰者知勸，驗丁產高下爲輕重，而役者始均。於富歲斂民之粟麥，使量出有餘，儲之大家，遇艱食則發而賑之，不責其

償而荒始有備。其去民之蠹，則禁治諸惡，少之目爲彪虎者十有二人，而豪猾爲之斂手。奏奪戍山衛軍職之無狀者十餘輩，而武人不敢爲暴。訟者在庭，是非立判，不以屬吏，而狡僞無所售其奸。萊陽民有誣其仇家十六人爲強盜者，宰弗能辯，榜掠成獄，已斃七人矣。乃訴諸朝，願質於君。君爲察其誣而釋之，人服其明。州人樸陋不學，君爲作新廟學而敦勸之。士始有齒於科目者，又立社學，刻小學，選子弟之俊秀者八百餘人，教之讀書習禮，而陋俗始變。州人薄於治喪，死者以席裹屍，榆穿骨，而瘞之淺土。君爲葬新舊十有三萬。民始知送終之禮。州俗多淫，君下令婚姻不得論財，以時婚嫁，其男女怨曠者三千有奇，而淫風始息。又葺養濟院，民之貧獨鰥寡者，使無失所。於是州人舊所流亡於外者，聞君之政，皆相率來歸。復業者至若千餘戶。先是夏秋嘗旱，君禱之，即雨，遂爲有年。越三歲，麥大熟，有一本兩岐，或三岐，五岐，至九岐者，民瑞之，爭持以獻。君辭不敢當，人歌頌焉。有螟生福山萊陽之境，食黍且盡，君以爲憂。比入州境，螟乃悉死。州東蒼山，狼出害人，君爲文自責，以告社稷山川諸神，而狼斃於野。時巡撫山東都御史賈公銓、原公傑、翁公世資相繼列君之治行于朝，三奉詔旌異之。且進其階奉直大夫，贈封其父母與妻，誥詞有公廉之聲，著于朝端。嘉祥之治，臻於海國，惟茲卓異，是用旌褒之語。未幾擢知贛州，贛爲江西劇郡，簿書叢委，狴獄充滿。君爲之明紀綱，剔奸弊，飭廢弛，而政始有經。日覽訴牒，動以千計，剖決如流，察其至隱，吏不得蚤緣爲奸。贛州有商人舟貨夜泊江澚，而舍舟登岸觀戲者，居民劉氏，矚其亡而攘取之。商人訟劉劫其貨，部使者史公瓊索其贓具存，將寘重辟。君悉其情，力與辯，得不死。瑞金廖某持斫殺人，部使者

陳公琦以廖當大辟。將罪其二弟以從而加功。君謂其弟雖嘗操刀爲從。而死者惟有所傷。似非加功者。陳悟遂減死論。零都民賴氏遭盜。因誣其仇家。而訴於府。君訊之。無他佐驗。遂白其誣。其用法平恕如此。郡城東西薄江。民無業者。皆墾江依城爲豆區之肆。以謀衣食。衛百戶王某求貨不得。奏令有司廛之事。下郡中。君上疏極言其不可。遂得不廛。民賴之。會昌城且圯。武人守城者。建白于巡按御史。欲以民修其。七。而軍乃三焉。君謂兵將久私其地。陸之利者。宜任其責。民貧不可勞也。卒不從。寧都地接建昌。有議割寧都之半。卜地洛口。以爲新邑。而隸之建昌者。事聞諸朝。檄君會議。君相其地不可邑。且新邑之分。富人。是利而貧民之病也。乃屬其民間之。持不可者甚衆。遂寢其事。議者猶或非之。未逾年。雷震洛口山。匯爲淵。始服其先識云。其爲政之利民如此。前郡守曹某始遷廟亭。而兩廡皆草創。爲風所敗。君請前部使者。史公得白金數百兩而新之。學制始備圖書。考古制作大成祭器。而釋奠始克成禮。又築養正書院。以修小學之教。簡屬邑秀民。可儒雅者。爲之擇師。而受業焉。以康齋吳聘君。嘗修鄉射禮。使諸生習之於學。以教其民。庶幾得爲國以禮之義。會昌有洞。曰常和。民負其險固。多強梗。弗率。凡有鬪爭。輒稱兵相賊殺。時或有爲亂者。有司末如之何。姑置之而已。君遣二耆老往諭之。民皆俯首聽命。願供職役。終君之去。無梗化者。其威德服人又如此。在贛七年。政方大行。而以內艱去官。服闋。改知永平。永平京畿近輔。政繁賦重。民不堪命。君平其賦役。理其冤滯。而痛繩其怙勢奸政者。一如寧海贛州之治。而仁惠加焉。其地北邊遼漠。營衛四列。兵部以君有才略威望。檄治邊防。凡軍旅之在境者。悉聽節制。君時已得疾。輿行營衛。一號

令問。軍民肅然。永平舊有義勇。久不教閱。君爲增選至數千人。除其戎器。以時而講武焉。君始得疾。猶日親政務。久之弗愈。乃上疏乞致其事。當道者以君惠愛得民。留之使臥治焉。疾已不可爲矣。以成化壬寅九月九日。終于任。距其生宣德丁未十一月癸卯。得年五十有六。配嚴氏。有賢行。以君貴。封宜人。生子六。長麟。丁未進士。次鳳。早殤。次駒。善克家。次熊。次龍。皆業進士。未第。季曰驥。尚幼。孫男若干。女若干。君爲人長身玉立。降準聳顙。姿貌魁傑。器識通敏。遇事動得肯綮。雖甚繁劇。處之沛然。爲學博於經史。子集。務通大義。不規規於章句。尤喜孟子。至老不釋手。爲文根據理道。明暢通快。如其爲人。平居恆自整飭。暑不袒裼。日必公服謁母中堂。然後退。受諸子婦省謁。常恨少孤。親不逮養。奉承遺教。罔敢失墜。事生母太宜人。以孝聞。分祿於寧海。迎養於贛。凡可娛心志適口體者。無不爲也。太宜人耄而目昏。嘗以舌舐之。疾視湯藥。衣不解帶。繼遭大故。哀毀枯瘠。其治喪一以家禮從事。不用世俗浮屠法。葬時與兄廷用同廬墓側。墳土乾。始歸。事諸兄恭而有禮。教子弟嚴而有方。祭祀以時。必精必潔。享賓有儀。必豐必腆。三歷州郡。每燭而出。燭而入。炎暑浹背。日不暇食。嘗大書榜公堂云。治官事如家事。以民心爲己心。於寧海則書吳隱之貪泉詩於屏風。以自警。在贛又以戒得榜退居之齋。卒於永平。囊無百金。其飭躬厲行有如是者。晚年涉歷既久。造詣益深。論事必先于義理之辨。論學必貴於體用之全。論士風必本於廉恥之謹。語必精當。所著有凝香稿。論喪禮書。咏史詩。藏於家。嗚呼。古之言良吏者。曰以治得民。君之爲治。可謂良矣。少出緒餘。試諸州郡。而遺愛在人。章章若是。非以治得民者乎。使天假之以年。而完其用焉。則其所就。豈但爲二千

石之良而已耶。可勝嘆哉。諸孤奉柩南還。以君卒之明年十二月庚申。葬于甘棠鄉安山之麓。謂余少從君游。交最厚。荷教最深。而知君爲最詳也。乃具疏遺事。俾爲之狀。將以乞銘於文章鉅公。而圖其不朽焉。予雖鄙陋不文。追惟平生。誼弗可辭。故爲類次其世出歷官。與言行之大略如右。然巨細畢錄。不敢簡略。其辭者。將以備立言君子之采擇也。謹狀。

莒州知州葉君行狀

君諱盛。字昌伯。姓葉氏。別號虛室。世居蘭谿瑞山鄉峴山之陰。曾大父某。大父以濂父璋。皆以德善稱於鄉。母沈氏。君幼有敏質。誦詩屬對皆過人。大父奇其不凡。鍾愛之。命從伯祖長史公以清治舉子業。期以科第起家。甫成章。已能操筆爲文。比入邑庠。文譽日起。諸老生皆斂手推讓。天順壬午。以詩領鄉薦。上春官。不偶。卒業南雍。益進學弗懈。成化乙未。登謝遷榜進士第。試政尙書膳部。以公事使外。便道歸省。適其大父年登八秩。姻舊咸集。君烏紗綵服。奉觴稱壽。人以比之晝錦之榮。丁酉還朝。銓授山東莒州知州。其民素稱桀黠難治。君以孔子無欲速一言。呂舍人當官三事。揭諸座右。一新庶政。興學校。均徭役。撫流移。恤孤寡。抑豪強。除盜賊。皆具有條法。聽斷獄訟。必盡其情。又修葺諸壇壝。以嚴祀事。期月之後。百廢具舉。明年州旱蝗。君虔誠露禱。雨以時降。蝗亦尋滅。其後麥秀兩岐。穀生九穗。城濠有白蓮。枯瘁者十餘年。至是復華。民以爲祥而歸德焉。部內諸惡少。有乘凶荒爲變者。君以計擒滅之。因請建十字路巡檢司。以備不虞。民用安堵。部使者以爲能。遣幣旌之。民饑且疫。君發所畜金帛以萬計賑之。病者則濟以粥藥。民來

就食。活者甚衆。沐水善泛。行者病涉。君作舟以濟。民懷其惠。號葉公渡云。迨九載將滿。士民交章赴當道。乞加職留任。而巡撫巡按諸部使。更以羊酒綵幣獎勞焉。天曹探奏最遷秩。而君俄以內艱解歸。豪猾有以非法事誣汗君者。幸當道素知君爲直其事。卒無所汗。蓋君居官嚴厲。人無所售其奸。故以此得名。而亦以此獲謗。君自是不復有仕進意。然輿論至今猶惜其才不盡用也。君天性孝友。事祖父及諸長幼。咸得其歡心。在官嘗分俸爲養。時適有輸金賜冠帶之令。君卽以俸金請給冠帶。爲祖父之榮。及居母喪。克謹於禮。與諸弟相友愛。當風日佳時。率子弟具肩輿。奉其祖若父若季父。周歷林圃。徜徉峴山之陽。笑談爲樂。又盛營田宅。蓄金帛。以施予其嫗族。不少吝。羣從子女有孤者。助其嫁娶。姑妹有適人而貧者。資之以立其家。有貧而產女不育者。助金穀以勸其育。內外親或嗇於治生者。貸之金帛。不責其利。其積財能散類如此。君嘗以悼亡之戚。自營幽壙於梅谷山。因修治故梅谷道院。結小蓬萊於其側。更號梅谷居士。其所著詩文。有梅谷稿。藏於家。弘治甲寅某月日。以疾終於家。距其生宣德乙卯某月日。享年六十。娶同里王氏。繼淳安邵氏。皆先卒。又繼錢塘王氏。生一子。曰澤。今爲國子生。孫男三。英。華。蕃。女二。嬋。姿。俱幼。將以某年月日。葬君梅谷山。與王氏邵氏同兆。澤謂予少游鄉校。與君同硯席。最相知。請爲之狀。但君之游宦在北。而予臥病田間。聲迹不聞。莫能悉其行事之詳。姑因澤所錄遺事。撫其大略如此。以俟立言君子採擇焉。謹狀。

序文

澹泊生鄭君冕挽詩序 以下挽詩

挽詩何始乎。其倣諸古虞殯之歌乎。蓋送葬者歌以挽柩。卽莊周氏之所謂緇謳者也。漢田橫死。吏不敢哭。但隨柩敝哀。以爲挽歌。厥後相承。遂以薤露送王公貴人。蒿里送大夫士庶。是則哀死之辭。而因以爲引緇者之所歌也。近世士大夫於故舊交游之喪。或相去數千百里。不能匍匐往弔。執紼臨穴。於是乎有哭之以詩者。則非復爲挽柩之用。而徒以寄其哀耳。蓋一變矣。又有孝子慈孫。不忍死其親。而托諸能言之士。爲詩以哀之。則今之挽詩是矣。是又一變也。夫以生不相知。而哀其死。不幾於涕之無從者乎。然以孝子慈孫之故。不逆其情。與其人之平生有足哀者。則爲是以洩其哀。事雖非古。其亦庶乎禮之以義起者歟。衢之常山。有澹泊生鄭君仕耀者。自幼穎敏。強記博識。嶄然不羣。嘗侍厥考。宦游莆中。從先生長老。考德問道。業進士。受詩書兩經。尤善於琴。莆之人士咸愛重焉。其居家事父母。無違禮。又嘗修譜牒。以尊祖。肯堂構以遺後。偉然奇器也。夫何有才不壽。弗究所志。是固有足哀者。卒之年僅二十。有二子。漲甫三歲。濱猶遺腹。厥配徐氏。操柏舟之義。寒燈孤幌。鋋心石腸。鞠孤養親。餘二十載。以節孝稱。乃今濱克有成。立爰始索諸名士大夫。及君故所相知者。得所爲挽詩若干首。哀爲一帙。間因其季父侍御公。謁予爲序。予謂鄭君於是不死矣。有妻守節。有子克家。又有難弟。致位六察。顯融于時。餘澤所被。不旣厚乎。而諸薦

紳之詩。又足以發潛德之幽光。播芳聲於不朽。豈直薤露蒿里哀死之云哉。君之目固將瞑於九泉而無憾矣。是用序而不辭。

抑齋陳君挽詩序 桂之父

曩予承乏僉閩憲事。聞諸父老言閩江之上。有隱君子焉。問其人。曰陳君叔復。而詢其行誼之詳。則曰君爲故封監察御史仲昌之季子。而翰林侍讀叔剛。湖南憲副叔紹之弟也。家世相融。而邱園自賁。懷抱利器。置藏弗售。以孝友之政施諸家。以嫻睦任恤。忠厚長者之行。儀於其鄉。以儒者詩書禮樂道德性命之學。教其子與兄弟之子。禮致賢士大夫。與之游處。嘗語之曰。吾聞太上有立德。其次立功。其次立言。爾曹當志其遠者大者。毋徒以明經術取青紫爲也。故其從子江西方伯文耀。鄉貢進士某。與其子文用。皆有得於義方之訓焉。晚年益務脩飭。自號抑齋。南昌張內翰廷祥。實爲記之。君之爲人若是。豈非鄉之善士也耶。予時將造其廬而問政焉。君已不復作矣。予復以病免。歸且十餘年。聞文用以進士起家。由潮州推官入拜臺察。君亦以子貴推恩。追贈南京貴州道監察御史。予又喜君之不死也。乃者文用奉璽書。按治於瀾間。與予相見。道舊故。出詩一帙。俾爲之序。予受而讀之。則君歿之後。其鄉人失所儀刑。相與歎歎。太息。作爲蒿里薤露之遺音。以相紉者之誦。與凡縉紳君子之思賢懷德。不能自已。而形諸嗟嘆詠歌者也。是非平生行誼。能使人感慕而不忘者。不幾爲涕之無從已乎。予雖弗獲識君。而雅知方伯侍御之賢。其文學政事。表表於時。使魯無君子。斯焉取斯。有以徵諸父老之言爲不忘也。然則諸君子之詩。所以發潛

闡幽而哀悼之不已者。亦豈無從之涕哉。故爲述其所聞。序諸首簡。使後之讀是詩者。得有考焉。

繼慈哀些序

浙藩參議衡山吳公某。行郡之暇。訪余山中。出示繼慈哀些編。而泣告於予曰。吾母太宜人武氏者。方其少時。擇所宜歸。不輕從人。而至於愆期。有孟光之志。先戶部公。聞其賢。求爲繼室。以鞠吾兄弟。不幸于歸。五載而喪所天。則誓堅柏舟。有共姜之節。罄居匹處。朝夕劬劬。供炊爨。織績以衣食。吾兄弟而進之於學。卒成二子。並以科第起家。列官中外。是雖翟母之織屨以隨方進者。弗能過也。晚歲以某貴。兩拜恩封。某時爲戶部尙書郎官。出使外藩。得便道歸省。承歡月餘。方圖終養。而竟以一疾奄然弗起。其爲悲痛。可忍言哉。不肖孤幼。失怙恃。賴先宜人長育成就。式勤且瘁。以有今日。生不克養。已抱終天之恨。沒又弗能昭示德善。以垂不朽。其何以慰吾親於地下乎。所以發潛闡幽。而相予之哀者。幸有諸君子之詩在焉。願吾子一言以序之也。嗚呼。世之爲繼母者。當夫存之時。不用虐其子。使之食棗花衣。蘆絮者。鮮矣。況于盛年夫亡。而能守節以成其子。若太宜人者乎。迹其賢行。雖程穆姜。芒慈母。豈能專美于前耶。此參議公之所以感慕。終身弗忘。而諸君子之詩。所以哀悼而嗟嘆之者。亦豈無從之涕哉。故爲書諸首簡。使後之讀是詩者。得有攷焉。

吳柏軒挽詩序

柏軒吳公。諱維。字翼之。湖南衡山浙江參議某之兄也。少游邑庠。種學積文。屹屹弗少懈。始舉進士於鄉。

褒然前列。主司錄其文以式後學。而不偶於春官。以銓高等。出宰靖安。公明敏有節概。蒞官三月。而庶政益新。宿蠹盡祛。民方向化。忽遭內艱。歸以哀毀。致疾而卒。遠近聞之。莫不驚歎悲悼。其故所相知者。以柏軒之學。之材之懿。宜有以昌其施也。而不假之年。弗究於用。方引而遽遏之。既逢而復嗇之。何其不得於天。若是耶。乃相率爲詩。抑按蒿里。薤露之遺音。以相縛者之謳。以致其悼惜之意焉。少參公不勝其孔懷之戚。乃彙集是詩。將以爲柏軒不朽之托。閒出示予。而屬爲之序。予聞古之君子。以立德立功立言爲不朽。非是三者。則雖貴傾一世。富擬封君。終與禽獸草木同腐耳。其能不朽也者。幾希。然雖有所立焉。非托諸文字。亦豈能久乎。若柏軒之學焉。而文足潤身。仕焉而政足及物。其志固將有所立矣。雖其身弗克壽。志弗克酬。未能就其所立。而獲稱於當代之君子。發其幽潛。播諸聲詩。使讀者思見其人。而有無窮之悲。則雖死猶不死焉。昔秦人之死者衆矣。而子車氏之三良。托于黃鳥之詩。至今不朽。則是詩所係。不亦重乎。此少參公所以深致其意也。予雖未獲識柏軒。而辱游於少參。觀其歷敷所至。卓有賢聲。意必有賢父兄。而信作者之不苟也。故爲序而不辭。

守菴林公追挽詩序

大司馬三山林公。書謂某曰。吾先公守菴。永樂中舉進士。歷知州縣。而終撫州知府。逮事五朝。三任牧民。咸有政惠。天順初。謝事歸休。後以瀚貴。三承恩典。初贈中議大夫。贊治尹。再贈通議大夫。禮部右侍郎。又加贈資政大夫。南京吏部尙書。有兩朝之錫命焉。瀚旣舉焚黃之禮矣。復求縉紳諸公爲追挽之詩。彙次

成帙。用慰先靈於九原。子其爲我序之。人之言曰。近世人子於喪親之際。皇皇望望。哀痛迫切。不能爲心。故又托諸能言之士。爲詩挽之。其與雍露蒿里之歌。以挽柩者。已不同矣。今吏部公謝世踰數十年。非復哀戚之時。曷爲而追挽之乎。士或生而不偶。志弗克伸。而死有遺憾。使人悲哀痛惜而不能已。則有詩以洩其哀情。今吏部公自少而壯。登高科。爲美官。名聲昭於時。利澤施於人。其志無不得焉。已非若彼之偶者矣。況有賢子孫。世其德業。文章遭時得位。光榮碩大。而荐承優渥。賁于泉壤。可謂顯親揚名孝之大者。乃人情之所至樂。亦奚以追挽爲哉。子謂大司馬之志。非可以常情議也。其殆楊子所謂事父母自知不足。永言孝思者乎。昔唐楊嗣復爲禮部侍郎。其父於陵。自洛入覲。嗣復率其門生往迎。元白諸公皆在焉。當世以爲美談。宋王溥爲宰相。陳堯叟爲樞密。皆有親在。二公嘗對客侍立終日。客不能安。士大夫皆以爲榮。位隆宰輔。而親猶在堂。豈非人子之至願也耶。今雖贈官二品。追崇二代。而先公弗克享受於生前。視彼之鯉庭桃李。侍立對客者。尙有慊焉。則大司馬永言孝思。能不重有感乎。拜恩之日。痛音容之不接。而哀慕之若新。則追挽之詩。可無作耶。縉紳諸君子。雖不及見吏部公。而觀其克開厥後之盛。有若大司馬焉。則其思賢懷德。高山景行。而發於聲詩。亦自有不容已者。夫豈無從之涕哉。故推本大司馬終慕之孝。以序夫作者之志。使後之讀是詩者。得有攷焉。若吏部公行業之懿。與其惠政之績。已具於墓文及他志者。皆不著。

趙郎中挽詩序

余友趙君有年。爲尙書工部郎中。克舉其職。甚有名稱。而弗肯屈節事中貴人。以故獲罪而去其官。比歸抵家。不數日。又以疾卒。諸孤祥等。悼君之生不得於天。而奪其年。不合於人。而失其官。有才弗獲究其用。有親弗獲終其養。教子弗獲視其成。而齋志以歿也。抱無涯之悲。圖所以爲不朽之托者。於是靖江令鄭君威甫。爲述其行。以揭諸墓。而趙州守童君邦英。又爲誌於幽堂。其鄉之名勝。與凡縉紳君子之知君者。莫不詩以挽之。祥乃彙爲一帙。而泣告於余曰。先君之從游於先生者有日矣。先生無一言以哀其死乎。余謂有年之家學所自。與其歷官行事。具於誌述者詳矣。余奚以爲言哉。惟其志弗克伸。身弗克壽。人皆以爲不幸而有遺憾也。予獨以爲不然。昔人謂古者以死爲歸。而所歸有不同焉。其正直於生。則而得其死者。爲暇豫而歸。佞媚於生前。而得其死者。爲跛躄而歸。以至於困窮而歸。髮鞠而歸。欣喜榮顯而歸者。皆視其平生所行何如耳。今世有依阿澆淝。乞播媚竈。以苟富貴者。其行虧於前。名穢於後。包羞含垢。以終身。所謂跛躄而歸。弗其歸路者也。若吾有年之所爲。則官雖失而於道未之有失。身雖沒而其善不與俱沒。謂非暇豫而歸。坦其歸路者乎。是固足以無憾矣。而又獲稱於當世之君子。詠歌嗟嘆。以發其潛闡。其幽則雖死猶不死焉。昔秦穆公之殉葬而死者。百七十有九人。其閒豈無有位而貴富者。然皆泯沒無聞。而獨子車氏之三子。至今爲烈。蓋以黃鳥之詩存焉耳。則君之所托以永其存。而伸其志者。不在茲乎。故爲書諸首簡。以慰君於冥漠。且釋其親與子之悲云。

趙生惟寅挽詩序

邑庠生趙徹。字惟寅。自少穎敏。好學。讀書過目成誦。其在學。與士友講論經義。必反覆詰難。弗明弗措。而作文。則默坐沉思。俟得義成章。然後操筆書之。未嘗更易一字。人以爲腹稿云。凡提學憲臣。考校諸生。恆居前列。而不偶於主司。累舉不第。其居家。有循行。父兄宗族。皆悅其孝。友人無閒言。其父忽患中風。不治。哀慟罔極。毀瘠骨立。因而致疾。亦不久而繼亡。得年僅三十有七。其所立如是。使天假之以年。則所就豈易量乎。固可悲矣。其妻章氏。子之女也。淑慧貞靜。不妄言笑。能恭上而惠下。內外宜之。不幸屢孕不育。亦遭疾而先卒。遂以無子。惟寅歿時。惟一媵抱幼女。呱呱而泣。其弟徹。因以子思桂爲之嗣。其負不孝之愆。不尤可悲乎。其平日交遊之親厚者。皆來奔問。而會哭失聲。旣又惜其有才不壽。而發爲咏歌。嗟嘆之辭。以致其哀悼不已之意焉。今年春。外甥思桂。忽來告曰。先君忝居甥館。荷教多矣。但其不幸早世。而齋志以沒。不肖孤。時方在童蒙。未有知識。不能乞銘。以誌其葬。不孝之罪大矣。賴有先友諸君子。哀挽之詩在焉。今哀聚成帙。願得一言。以發明作者之志。以垂示後人。則其生雖不偶於時。死或有聞於後。雖死無憾矣。予謂惟寅力學而未能揚名。以顯其親。居喪而弗克終制。以報其親。又爲家嗣。而無子以承宗祀。其不得乎天者若是。自世俗觀之。誠有不能無憾者。然其文學見推於士林。而行義獲稱於鄉黨。則得諸天者。亦云厚矣。及有文人才士。爲之詩章。以發潛德之幽光。而播芳馨於不泯。則昌黎所謂命雖云短。今其存實長。亦何有於遺憾乎。故爲書諸簡首。使讀是詩者。得有考焉。

閩文獻之邦。莆稱最古。賢俊之流。芳載籍。與今之薦紳先生。位顯融隆。聞望者。某既得仰休光。拜下風矣。獨山林泉石閒。或有高世之士。潛德弗耀者。竊有慕焉。而未之聞。歲丙戌。莆人黃仲昭。以明經登第。某辱同年。且同官。因得諮所未聞。仲昭爲予道其舅氏梅所先生之賢。曰。先生姓鄭。字士芳。別號梅所。系出南湖。太府後。自侍御伯玉而下。世載厥美。以學行教諭閩縣。諱彥成者。先生祖也。博通經史。以詩文楷篆名于時。爲太學生。諱力久者。先生之父。仲昭先外祖也。先生聰敏端重。家學有自。居鄉以齒德爲衆所式。凡宗戚鄰里閒。義有當爲者。皆以身率先。人有過。折之不少貸。無不心服者。以母老。累辭徵辟。教授于鄉。鄉之有名位于時者。多出其門。如仲昭無似。幸得竊祿于朝。亦其餘教所及也。予聞而益慕之。以爲有古隱君子之風。第以未識面爲憾。越明年丁亥。仲昭謂予曰。吾舅以戊寅正月二十八日生。與姙李氏。今年壽偕七秩。仲昭以官守。不得奉觴拜慶。敢取魯頌。既多壽祉。黃髮兒齒爲韻。丐諸僚友。詩以祝之。旣成什。將附歸以壽。以吾子辱契最厚。而舅氏之賢。又吾子喜談而樂道者。願以序請。予曰。是。其所謂梅所先生者耶。某雖未及見之。庸敢無一詞。以道吾嚮往之懷。先生以梅自號。而清標雅韻。與梅特類。請以梅爲先生壽可乎。夫不求聞達。而雲耕月釣於寂寞之鄉。卽梅之冷淡。不爲桃李態也。以道淑人。名聞四流。梅之領袖羣芳。清芬旁襲也。黃耆台背。老而益壯。梅之鐵幹虬枝。多歷年數。風雪不能侵也。伉儷偕老。德音不遠。梅之友貞松。朋慈竹。同背歲寒之操也。繼今以往。咀陰陽之粹。飲天地之和。神完氣充。壽考無期。將與成。都臥梅。同其悠久。異日國家崇先王養老之禮。或養憲。或乞言。必於先生焉。是取。是又梅之薦周籩羹商。

鼎時至卽爲之也。昔人以梅爲花之儒者。其先生之謂乎。若夫羣士大夫之作大篇短章。春容古雅。所以尊高年。頌善德。而發揚賢宅相祝願之情者。無所不用其至。蓋非特爲先生壽。亦以幸斯文一脈之所由也。予故序而不辭。

章靜菴壽詩序

鄞章元益。與某同第進士。讀書翰林。且譜系俱出浦城邵文簡公。兼有宗盟之好。相得懽甚。居歲餘。元益每對景。輒愀然有不豫色。詰之。則曰。益奉命大人來舉進士京師。以業未就。因留學焉。今茲始得一第。然旨甘滫瀡之養。定省起居之問。曠焉者七載。欲歸侍則繫於官守。迎養則遠不可致。況吾父今年甲子一週。夏五月七日。其初度也。此尤人子喜懼之日。而益越在異鄉。弗得躬奉一觴爲壽。白雲之望。能不愧然于懷。某曰。不遑將父。在古有之。豈惟今日。且元益之仕。親志也。使子而家食。雖無離憂。父母之心。或者不若登第之樂乎。子能秉德蹈道。恪恭王職。不虧乃行。不辱乃親。則足以樂其心。不違其志矣。用是爲養。雖三牲五鼎。殆未足爲多也。況尊翁靜菴先生。年未甚高。耳目精明。筋力強健。鬢髮猶未種種。福祿方且綏之。非日薄四山之比。子他日宦成。謁告而歸。承顏膝下。亦未爲晚。何庸若是戚戚乎。元益曰。雖然。於吾心終有不能釋然者。必有以少致吾意焉。而後可。於是同遊翰林者。感元益之義。皆曰。盍爲詩。祝靜菴之壽。俾元益持是歸。獻其親。厥兄若弟。當綵舞之餘。採四明之芝。酌鏡川之酒。取而歌之。爲壽觴之勸。則靜菴聞之。必益喜。食而飽。酒而醉。心安而身愈康矣。當是時。元益雖不在左右。猶在左右矣。元益起而謝曰。是

所願也。遂摘行葦詩壽考惟祺以介景福八字爲韻分而賦焉。元益謂某家人也。不可以無說。爰命序於首簡。某竊惟天道無親。常與善人。靜菴之善行。吾雖未悉其詳。然觀其耆而艾。熾而昌。有子賢以孝。則天之報施之厚。其必有以取之。決非偶然也。由是而加栽培焉。天之所與將不止是。必有以符羣公祝願之辭矣。是用序而不辭。

徐母程氏壽詩序

永康徐生訪介其父友宜興司訓應君來過予曰。訪之先君子。明經修行。植志不凡。以友善爲未足。嘗往南都。從名士大夫遊處。考德問業。而聞見益博。造詣益精。業成而歸。後進之士多師事焉。夫何筭瑟異尙。而累舉不第。竟齋志以終。吾母程氏。今南京大理副瑞卿之女兒也。秉德幽貞。勵行勤儉。上孝下慈。內和外順。方欲左右吾父。誕啓有家。不幸僅踰三十。遽罹大故。寒燈孤幌。柏舟靡他。屏華飾躬。織紡益以家自勩。劬勞吹棘。進吾兄弟於學。冀終先君之志。今長兄讚叨第乙丑進士。出宰棗強。迎養官所。庶幾少酬丸熊之望。而訪猶垂翅雲霄。未克成立。不可爲子。無所逃罪。吾母之生。歲在庚午。以絳老之數計之。蓋歷甲子三百有六十矣。陽月六日。其初度設悅之辰也。吾心懷寸草。望切飛雲。而身羈庠校。弗克從吾兄拜舞膝下。稱觴爲壽。何以慰母心乎。鄉之士友。莫不爲歌詩。以頌難老。彙以成帙。將附致兄所。爲壽觴之侑。願先生一言以序之。予以耄荒不文。辭之再四。而生請不置。應君曰。生之季父廣東參議希曾。昔在南都諫垣。與其舅氏瑞卿在棘寺。皆先生素所厚善。而讚爲舉子。卒業太學。又在門下諸生之列。嘗辱與進。生緣

是雅故欲假一言以爲壽。先生其忍忽然不屑教乎。予不獲卒辭。乃復於應君曰。世之人子莫不欲壽其親。而壽之則有道焉。區區不斐之言。曷足以壽人之母哉。所以壽其母者。在生之兄弟而已。若太孺人之不負所天。克成令子。婦道母儀。兩全無愧。徵諸中庸栽培之說。固有必壽之道。然未足爲壽之至也。若簡狄以契壽。姜姬以稷壽。顏氏孟母以邱軻壽。四母者之壽。與天地相爲無窮。豈非栽培之大者乎。生之兄弟能希賢希聖。學而德進。仕而業廣。達爲稷契。而窮爲孔孟。則其所以栽培孺人之壽者。及奚止於一世之長而已耶。此吾鄉人士友之所深望者。苟徒養以六百石之祿。而榮以銅章墨綬之華。朱緋銀魚之貴。爲安仁之花前板輿。爲楚萊之堂下斑斕。獻幽風介壽之酒。歌闕宮燕喜之頌。不過世俗之所謂壽親者耳。殆未足以究生兄弟之志也。吾故爲表而出之。以爲羣玉之引。

望雲祝壽圖詩序

予友盛君廷珮。居太學者三四年矣。學勤行修。不自矜衒。六館士無少長。咸喜納交於君。譽之者喙相鼓也。性恬於榮進。雖舉進士數不利。亦不以屑意。惟日念二親垂白在堂。溫清滌滌。不時親也。恆欲謁告歸省。以拘於令。不果。今年春二月朔。適乃翁克高甫。懸弧之旦。上距所生。蓋三百有六十甲子矣。君思悵然。不能爲懷。時或登高東望。若有見者。爰取昔人望雲之義。命丹青者貌而圖之。薦紳交游之士。復爲詩歌詠其事。君彙次成軸。持謂某曰。太學何蕃久不歸。十年甘旨娛親幃。吾咎大矣。今將以是歸壽吾親。子庸無一言乎。某聞之瞿然。人之少也。慕父母。已而遷於少艾。衰於妻子。卒乃移其慕于仕宦。不得而熱中者。

比比也。若君年踰強仕，未沾一命，猶戀戀於其親者，蓋寡。君可謂加於人數等矣。苟充是心，當自有足壽。其親者，尙何假乎望雲之祝耶？雖然，君之志我知之，養親者不以口體，而以其志。壽親者不以一世，而以萬世。世之人固有貴於金張，富於朱頓，三牲而壽，千金爲壽者矣。而卒於草木同腐，曾不能少延其親於一日。彼豈不欲壽哉？顧壽之者非其道耳。狄梁公立馬太行，目斷飛雲，不過一念孝思之誠，非有驚世駭俗之行。然天下後世莫不景慕其人，稱頌其事不置，遂使其親之名之壽。至於今而未艾，傳所謂去之五百歲其人若存者，公其似之矣。是果望雲之能壽其親耶？抑亦公之平生所以顯揚乃親而爲之壽。有出於望雲之外耶？立身行己如公，樹勳揚休如公，忠孝大節如公，則今日鍾阜之雲亦前日太行之雲也。尊翁之壽又可量也耶？君其勉乎哉！某也魯，辱君之知最久，非燕游一朝之好也，故不敢爲世俗常語，而以君子壽親之大者，廣君之志云。

菊泉怡壽詩序 李守·名汝嘉·

衢州李侯，泉南人也。起家進士，以尙書戶部郎官來爲是州。視民之所欲惡而弛張之，摧姦強，惠貧弱，大修郡縣之學，以敷文教。而城垣樓櫓之有圯壞者，亦時葺之。弗忘武備焉。旣六載而績用有成，田里熙熙，無愁嘆聲。侯未嘗自以爲德。方且爲伯玉之知非，益勤其所未至。詩所謂樂只君子，民之父母，樂只君子，遐不作。侯其有焉。乃季秋二十四日，適侯初度，距其生甲子已三百矣。而來者未可旣也。庠序之師，諸君祺，告于衆曰：侯之勤于政，仁于民，古良二千石，弗能過也。矧吾與二三子者，無小無大，從侯于邁，可

無一言以爲壽觴祝乎。維茲之日。菊有黃花。聞古之人有飲菊水而壽者。盍亦以是播諸歌詠乎。衆皆曰。然。遂摘取蘇老泉詩。氣稟金行秀。德備黃中美。古來鶴髮翁。食英飲其水。二十字爲韻。人各以其韻賦詩爲壽。而題其卷。曰菊泉怡壽云。詩旣成。諸君以予於侯爲舊契。使其徒某持以示予。屬爲之序。嗚呼。自天下郡縣以來。今之郡守猶古諸侯也。故詩人之祝其君者必以壽。而祝之壽者必以物爲況。若闕宮之崗陵。天保之南山松柏是已。夫岡陵松柏物之壽者。未聞壽人也。詩人猶有取焉。若菊之爲物。雖不以壽名。而能壽人。其見於神農書風俗通以及諸傳記之所載者。往往可徵。況其早植晚發。黃中通理。燁然獨秀於風霜搖落之際。又有君子之道焉。奚起松柏山陵爲物之壽者哉。侯之生維菊之時。侯之賢比德於菊。而衢之所亦多菊之地也。以若人守若土而服焉。其壽宜何如耶。諸君之詩所以反覆詠嘆而不能已者。其意豈異於天保闕宮也耶。雖然。侯之壽豈以一身爲哉。其推之醫國庇民。衢人之痒疴疾痛天昏札瘥者。咸有瘳焉。則衢之水皆菊潭也。衢之士皆壽鄉也。而奚止於一身之壽哉。然猶未也。其進而羽儀於天朝。又將移其所以壽衢人而壽天下。則侯之爲壽不尤大乎。又余之所深望者。

入山先生六十壽詩序

予友吾先生景端。奮乎太末之墟。而節行文學卓乎當世。始出而論秀於鄉。哀然魁薦。比入京師。游太學。六館之英。斂筆推讓。達官名士。內交恐後。貴游子弟。爭從受業。莫不以倫魁擬之。而五上春官。不一偶。蓋工於瑟而不工於求齊也。嘗以親老棄進士舉。俛就乙科。得教諭江浦。母夫人時已有疾。弗任遠途。乃獨

侍翁慎齋以之官而留其妻若子養母於家居數歲慎齋忽有所不樂遂復棄官以歸政施厥家而宗黨外內莫或閒言蓋其爵以天不以人也誨人講學爲文聲譽不倦而於禮義廉恥孝弟忠信之行尤惓惓焉士類翕然興起及去江浦而家食者又十餘年矣四方學者考德問業戶屨常滿隨其才分咸有所得斯又其推以及人者也先生之表表若是而欲然不自足焉進德之功老而彌篤其亦庶乎有道之士哉先生之生歲在重光大淵獻而今茲之歲又復在焉八月己酉其初度也以絳老之例推之蓋歷三百六十有五己酉矣而精明強健無異壯時爲壽未可量也吾黨之士某輩仰昌黎之山斗有不勝其祝愿之私者相率賦詩以爲壽觴之侑而屬予序之或曰死生富貴有命在天壽非人所能爲也其可以祝而得哉天之生物栽者培之以先生之所樹立栽之深矣則其因材而篤將必有培之者而奚假乎人言之祝哉或曰不然書稱人之所欲天必從之則天非有外於人也其不可以祝而得哉古三百篇所錄若南山有臺若瞻彼洛矣若蓼蕭鴈鳩行葦旣醉諸詩之頌其君子往往以壽祝之亦豈無其理而爲之者哉況乎周王壽考遐不作人則壽先生者斯文之所由壽也而可以不祝乎哉予謂二說雖殊各有攸當在先生者不容於祝而有必培之天在後學則不容不祝以覲乎從欲之天也天之所存其壽之所存乎若先生之所以自處則知天不二而事天以終身俛焉孳孳不知年數之不足而前所謂二者之天又有不容計者豈曰壽之云乎以予之辱游最久而荷教爲獨厚也故不敢以他辭佞而述其所聞於先生者以爲序

壽吳晦叔六十序

予昔游鄉校。友諸俊髦。有吳明晦仲者。從子業進士。而其弟晦叔。則業醫。並能精勤所業。予嘉其必將有成也。迨予自閩憲謝病歸田里。則晦叔已領薦書。而晦叔亦爲醫學訓科矣。夫何晦叔不幸蚤世。未覩其成。獨晦叔以醫之良。入供職太醫。不相見者踰二十年。數聞其被命典六軍及五城醫事。聲稱籍甚。士大夫從君問方藥。車馬接跡於門。則其業可謂有成矣。昨歲癸亥。予蒙恩起廢。備員冑監。則疇昔同游之士。在南都。惟夏官員外郎童君廷式。而仕於朝者。亦惟吳君晦叔焉。間與童君相過。談舊故。未嘗不嘆歲月遄邁。吾生易老。而久要之落落如晨星也。童君又言晦叔爾時。年方英妙。今亦艾而耆矣。九月十日。其初度也。願丐一言。以爲之壽。予謂晦叔家世之賢。內行之善。與其藝業之精。前秋官主事姜君仁夫之文。已嘗稱述。而推本其所以壽者。美矣備矣。予何假於贅言哉。敢謝不敏。而童君索之不置。乃作而言曰。吳君爲黃帝之學者也。吾聞黃帝岐伯之書。有所謂提挈天地。把握陰陽。獨立守神。而壽無終時者。有所謂淳德全道。和陰陽。調四時。而積精益壽者。又有所謂處天地之和。從八風之理。怡愉自得。而亦可百數者。是皆吳君所素習。能得其術。則於壽其身也。何有哉。然黃帝之道。不獨是也。其傳於吾儒者。有丹書之敬義。充極其道。又可以位天地。育萬物。壽國家於千萬世之久。而無滅廢。是奚止於一身之壽哉。所謂上醫醫國者也。吳君世業儒。而教其諸子。皆以儒。亦有得於是乎否也。君以伎藝。較進用。尚亦以儒而醫。爲今日之岐伯。上以致吾君於軒轅。下以措斯世於仁壽。則其壽不尤大乎。在勉之而已。童君曰。此正吳君所

欲聞者請書以爲壽觴之侑。

壽徐希曾母七秩序

吾婺爲浙水東文獻之邦。由宋以來名公輩出。立德立功立言者。英風義概。表表于時。他郡莫及焉。而今世之士罕有聞者。予嘗悼徽音之莫嗣。爲可愧也。近以衰晚。蒙恩起廢。來官南雍。始識永康徐君希曾。以明經登第。官刑科給事中。侃侃論事。不畏強禦。有古爭臣風。旣而以母老。奏乞便養。得改南京工科。論事益切。權幸側目。有中傷之者。幸天鑒其忠。卒以無虞。而志不少挫。其所樹立。當不止是。庶幾振起頽風。於鄉邦先正有光焉。後生可畏。殆非虛語。然意其必有所自也。忽太學生某帶來告曰。徐君之母太孺人樓氏。宋樞密襄靖彥輝之裔。而武昌守仲和之孫女也。爲贈刑科給事中仕家之配。在室而勤女事。姆訓是閑。于歸而佐奉。養婦德用光。不幸蚤喪。所天含哀茹苦。維持門戶。堅柏舟之節。晝夜劬劬。鞠其七子。以長以教。備鴈鳩之德。其長若仲。皆力業成家。卓卓有立。而希曾其季也。居官有聲。推恩及親。太孺人童顏鶴髮。洩洩在堂。翟冠霞帔。命服有耀。固宜其多福綏之。而壽考介之也。乃弘治乙丑年。躋七十九。月十有七日。其設脫之辰也。希曾陟屺有懷。白雲在望。將乞假歸省。而奉觴膝下。以稱壽焉。適朝廷推選廷臣之賢。出佐方獄。而希曾有廣東亞參之命。而星軺玉節。便道故鄉。緋衣象簡。戲舞於庭。以樂其親。此人生之至榮。而吾鄉之盛事也。南都士夫莫不爲詩以歌咏其事。希曾榮爲一帙。將持歸以爲壽觴之侑。願先生一言以序之。予旣重希曾之賢。而又樂其母之壽也。乃作而言曰。世有斷織之母。而後有以進其子之學。有

倚門之母。而後成其子之忠。使非有孺人之貞善。希曾何以能若是乎。是宜諸君子之侈爲歌詠。以祝其壽也。昔朱子壽劉忠肅之母卓夫人也。其詩曰。賸喜古人頻獻納。足知賢母外榮名。吾於壽母及希曾見之。又曰。生朝舉酒天香發。賤子當歌魯頌聲。則諸君子有焉。某也不斐之言。莫能罄其祝願之私。敢誦是詩。以爲太孺人壽。希曾往而旬宣外服。其尙以忠肅之德業勳名自勵。益綿孺人之壽於無窮。則於先正諸公。可匹休而並美矣。豈徒鄉邦一時之榮而已哉。

山海齊壽圖詩序

頃予被命。起自休退。備員南雍。凡吾越諸君子之在南都者。不鄙老朽。咸辱與游。而侍御葛君。尤相厚善。君世家上虞。由明經登第。出宰五河。尋以治行優異。擢拜臺察。慨然有澄清志。肅憲度。補袞闕。別臧否。糾姦慝。達於大體。而不事苛細。凡所建白。多切時政。公卿大夫莫不賢之。予竊以爲魯無君子。斯焉取斯。其必有所自矣。已而君介其友大理陳君勉之。程君瑞卿。來告曰。侍御之嚴君澹菴先生者。居於市不爲市之道。讀書好古。而邱園是賁。以勤儉裕其家。以孝友爲其政。以義方教其子姓。時或鳴琴賦詩。宴遊爲樂。蓋深得考槃之趣者。弘治壬戌。以侍御貴。勅封文林郎。五河知縣。今年又承恩詔。得同其子服色。先生與其賢配孺人鄭氏。年皆七十餘矣。季冬望日。與孟夏六日。其垂弧設帨之辰也。童顏鶴髮。洩洩在堂。豸服翟冠。輝煌里閭。此人生之至榮。鄉邦之盛事也。適侍御以公事趨朝。得使道過家省侍。因命工繪山海齊壽圖。而縉紳士夫。莫不爲詩以歌咏其事。將持歸爲壽觴之侑。願得一言以序之。予於澹菴。未獲一面。將

奚以爲言哉。敢謝不敏。而二君以爲侍御之意不可虛辱也。乃作而言曰。世之人子莫不願其親之壽。而親未必皆壽。親亦莫不願其子之賢。而子未必皆賢。願者牛毛。遂者鱗角。人皆以爲壽夭賢否之命於天。而不可必也。然而傳曰。大德必得其壽。曰。仁者必有後。又若有可必者。其故何哉。蓋天之生物。栽者培之。理則然也。今以澹菴爲之父。而伉儷皆壽。福祿來崇。以侍御爲之子。而高第顯官。榮及所生。其父子所願無弗遂焉。謂非天之可必者耶。然非有以栽之。能若是乎。是宜諸君子之嘉嘆而咏歌之也。夫澹菴旣戾於前而獲其培矣。繼今侍御其尙益加栽植。以答天貺。樹勳揚休。而流芳竹帛。若鄉之先正杜祁公。李莊簡。劉忠公焉。則天之保佑中重。以培乎澹菴者。庸有旣乎。其福祿壽考。殆將與南山之不騫。不崩。東海之不盈。不虛者。同乎無疆。而大遂其所願矣。夫豈止於一鄉之榮。一世之長而已哉。斯固侍御繪圖之意也。爰用書諸首簡。以爲羣玉之引。

壽松圖詩序

吾邑著姓。稱靈湖郭氏。自其先曾祖朶翁。積德累善。用昌厥家。若子若孫。世載厥美。以培以植。益大以豐。再世後。官部署。職臺憲者。相望。伯仲間。逮今中舍君。又以科第起家。爲時顯宦。羣從子弟。皆彬彬文雅。有謝庭玉樹之風。簪纓之盛。貲產之富。甲于一邑。其宗子曰時端者。中舍君之伯兄也。質良行淳。篤於友愛。尤善治生。克亢其宗。景泰中。嘗以入粟餉軍。賜冠帶。又嘗糴他邑穀。貸族人之飢。弗人其息。自築別墅一區。名曰湖東草堂。屋外環樹松竹。翠色落牕。戶間可玩。几上無長物。惟古人詩一帙。暇則取而歌之。以自

適客至。治具相飲。微醉輒罷。其積財能散。蕭散不羣。有如此者。今年某月日。春秋五十。中舍君貌壽松圖。索諸縉紳詩。以爲壽觴之祝。俾予序之。昔人謂松有正心勁質。用固其本。君子儀之。請以松爲時端。壽可乎。名門右族。其生也得於天者固厚。而所以養其生者。又無不厚。其於多福之綏。壽考之介。蓋有不期而然者。譬若松然。托根嵩岱之間。其地幽。其泉深。其土沃。夜氣之息。時雨之潤。沆瀣之華。注於內。日月之光。薄其外。而牛羊斧斤不能近焉。固宜其生意勃勃。敷榮暢茂。鬱然喬然。拔地千尺。其高干雲。其大蔽牛。挺然獨異於凡木也。諸父昆弟。比此顯融。而獨托跡田里。無榮進意。松之深林獨秀。不與紅紫而爭春。贏於財。可推以及人。松之有子。可以薦豆籩。有苓足以充藥餌也。春秋之富。垂垂半百。而肌髮略不少變。耳目精明。如少壯時。耄耋期頤。蓋將進而未艾。松之四時青青。不改柯葉。攘冰霜。實歲寒而後凋也。繼今而往。益修孝友敦睦之行。忠厚長者之風。刑於家而薰及其鄉。使年彌高而德彌邵。異時國家崇三老五更之典。養憲也。乞言也。將有取焉。是又松之柱明堂。棟大廈。無施而不可矣。嗚呼。時端其敬勉之哉。中舍君有取於松而爲君壽者。其不以是也耶。予故推廣其說。以爲羣玉之引。

泮宮介壽圖詩序

姑蘇楊君某之訓導蘭谿也。迎其母以就養。其明年爲成化甲辰。母夫人高年九十矣。顏童髮鶴。食飲步履。略不少衰。爲壽有未可量者。是歲之孟冬二十四日。則設帨之辰也。時在學之僚友諸生。與吾邑之大夫。以及縉紳君子之老于其鄉者。相率具酒殽。命工作樂。高會以慶之。楊君用楚菜故事。烏紗繡服。戲舞。

踴躍奉觴爲壽。其樂融融。邑人歆慕而聚觀者。蓋如堵焉。於是掌教事水新賀先生。貳教吉水宋先生。合辭而嘆美曰。是非獨楊君一家之榮。蓋儒林之盛典。而風化之所係也。蓋各賦詩以紀其盛。衆皆曰。好事者因遂繪之。以爲泮宮介壽圖云。楊君會萃成帙。俾予爲序。予惟諸君於泮宮飲酒。豈非有得於古人泮水之義乎。請誦是詩以爲壽。夫庠序學校者。先王國老庶老之養。皆在焉。楊君之養。得其地矣。而爲此春酒。以介眉壽。則壽之得其道。詩人之言曰。既飲旨酒。永錫難老。吾於壽母見之。國家建學立師。將以申孝弟明人倫也。使師儒以言爲教。曷若身教之爲易耶。故其詩曰。載色載笑。匪怒伊教。又曰。敬慎威儀。維民之則。吾於楊君見之。然上之所好。下必甚焉。異時風化之行。則濟濟多士。豈無充廣德心。而篤於孝悌者乎。若大若小。又豈無從君子邁。而各親其親。各長其長者乎。老吾老。以及人之老。則天下皆壽域也。是豈但爲一人之壽而已哉。楊君之孝。於是爲不匱矣。繼今其益篤不忘。靡有不孝。自求伊祐。則天所以壽君之母者。庸有旣乎。旣多壽祉。黃髮兒齒。予也。又將賦闕宮之八章。以爲頌君其勉乎哉。

楓山章先生集卷之七

序

送進士還鄉序 以下遂行

吾少時讀柳子厚送苑論歸覲詩序。見其有所謂風雨筆札雲煙簡牘。與夫桂枝片玉。光生於家。曳裾莪冠。榮南諸侯之邦者。未嘗不羨其文章之富。慕其登第之榮也。及觀韓昌黎之贈張童子。乃曰。愈將進童子於道。又曰。童子宜暫息乎。其已學者。而勤乎其未學者。然後知仁人君子愛人以德者。其用心固如此。彼柳所誇者。不過庸人之見。世俗之言耳。嗚呼。士君子所當爲者。寧獨富文章取科第而已乎。成化丙戌之春。翰林學士劉公奉天子命。品藻天下士。某君某。以雄文碩學。擢高第。而懋亦幸與其列。視昔之柳與苑。韓與張。同出顧公陸公之門者。事頗相類。已而君以天官奏。得循例歸省其親。老其問學。以俟召用。又與苑張之歸覲者。適相似。君之行也。吾不敢以柳之言瀆君聽。敢推明韓之所謂進於道者。而贈君可乎。夫聖賢之道。載諸經。具之吾心。而著於日用事物人倫之間。不可須臾離者。君歸尙當讀所未讀之書。窮所未窮之理。而以其平日講明之得。諸經者。若大學之敬。中庸之誠。論語之操存涵養。孟子之體驗充廣。一一反之身心。實踐而力行之。盡落其華。以就其實。用試厥政於一家。則內而父子兄弟夫婦。外而宗族。

鄉鄰州里。凡其事親事長處。已待人應酬交際之間。舉無或背於道。求之吾心而無歉。考之聖賢而不謬。驗之內外而無怨。則身修而家齊。所以治國平天下者。不外是矣。他日立乎朝廷之上。推其所學。見諸實用。功名事業。直欲追蹤古人。不爲漢唐以下人物。夫然後上不負天子。中不玷科目。下不誤蒼生。而於道其庶幾乎。苟徒充經筵。茂文苑。一舉及第。便謂終身事業在是。則草廬先生所謂鄙人而已。何取哉。懋不肖無似。願與君共加勉焉。

送金教授之安慶序 丁亥在京作

武義金先生。以晉江縣文學官。滿考來京師。選曹秩其最。拜安慶郡博士。將行。別其友章懋。丐言爲贈。某告之曰。師道之不立久矣。先生其知之乎。聖人之道。有體有用。有文。其體君臣父子仁義禮樂。其文六經子史。其用澤潤生民。歸於皇極。大學之格物致知。所以博其文也。誠意正心修身。所以充其體也。齊家治國平天下。所以措諸用也。師之所以教。教此而已。弟子之所以學。學此而已。三代而下。惟安定湖學之教。有得於此。出其門者。淵篤純明。直溫簡諒。多爲有用之才。故後之言師者。必歸焉。師道廢。學術隨之。學術壞。士習隨之。呻吟佔畢。以爲學。風雲月露。以爲文。富貴青紫。以爲志。如是而望其有成材。難矣。嗚呼。國家建學立師。以陶冶人物。隆化美俗。豈固欲其如是而已耶。安慶古舒州也。舒昔有文翁者。爲蜀守。尙能使蜀文風比鄒魯。則舒人之知學舊矣。又況有游定夫道德之澤。余廷心忠義之化存焉。則其人必多賢豪之士。不溺於世俗之學者。先生好尙古道。而遂於春秋。久爲教官。甚得士譽。良師也。今茲蒞教。是邦章句。

舉業之外。盍亦從事體用之學。以復於古乎。他日教道有成。則棟梁榱桷之詩。又當爲先生賦之。

送劉世美還京序

成化丙戌春三月。廷試進士。賜羅倫等三百五十有二人。及第出身有差。旣而循故事。選進士充庶吉士。員居之翰林。膳以大官。而不勞以職務。俾之盡讀中祕之書。以修其所能。充其所未至。蓋將儲養成就。大其器業。以待他日之用。其爲人才治道計者至重也。惟時在列之士。閩中林亨大。王世英。吉水宋爾章。華亭張汝欽。姚江邵惟貞。天津劉世美。莆陽黃仲昭。東安施彥厚。洛陽翟廷光。淳安商懋衡。安成李廷章。耒陽謝元吉。江浦莊孔易。石宗海。貴溪畢廷珍。新淦何惟一。山海鄭克脩。甬東章元益。上虞陸克深。海虞李世賢。番禺鍾美宣。閩中王文魁。張壽夫。皆一時俊髦。而懋之不肖。亦獲廁名其間。凡二十有四人。咸以布衣。首際隆遇。罔不感憤思奮。圖惟報稱。相與切磨講習。端乃心。正乃學。砥礪乃名節。平居論議。必以古人。上不負天子。下不負所學。相規勉。慷慨自許。契誼相投。蓋金可斷。而蘭與臭也。豈非一時之幸哉。居歲餘。而壽夫。文魁。相繼以卒。亨大。復以母喪去。存者蓋二十有一人。未幾而拜官之命下矣。爾章。世賢。仲昭。懋衡。與某。皆爲翰林。編修。孔易。檢討。彥厚。廷光。元益。皆給事中。元吉。克修。汝欽。惟貞。惟一。廷章。皆監察御史。世美。世英。宗海。美宣。主事。戶部。而克深。禮部。廷珍。水部。出視事於濟寧。或官守。或言責。各有攸司。曾未踰時。而某與仲昭。孔易。俱以罪謫。補外。仲昭。知湘潭。孔易。判桂陽。某亦待罪臨武。遐荒萬里。自分永與朋舊。睽隔矣。已而以言者留南都。仲昭。暨某。評大理。孔易。副行人。其後元吉。以言事忤旨。出爲南陵丞。惟貞。謫

知浦江美宣謝病歸南海。皆道出金陵。邂逅一敘平生。獨恨爾章。又爾物故。徒以旅櫬過此。某等又相與哭而送之。江之漘。追感疇昔。寧不爲之慨然也耶。去年冬。世美適以公事來南都。寓於館人者四閱月。因得數相過從。閒與道舊。則世英復以憂去。克修諸人。亦往往銜命走四方。其朝夕聚首於京師者無幾矣。因相與竊嘆。向之二十四人者。別幾何時。而去就存歿。升沉離合。不齊已若是。而況於數十年之後。三百五十人之衆乎。其不齊殆必有甚焉者矣。雖然。事變之不齊者。天也。於萬變不齊之中。而求所以齊者。人也。彼死生也。去就也。升沉也。離合也。天之所爲者。吾固不得而齊之。若乃立身行己之道。事君之義。不以死生而變。不以去就而移。不以升沉離合而異。吾徒之所以自許。有不在天而在人者。獨不可得而齊乎。齊其所可齊。而於所不可齊者。有弗計焉。則夫不齊也者。又所以爲齊也。願因世美。以諭諸同志。尙能於人事不齊之後。不忘久要之言乎。世美歸金陵。大夫士咸詩以餞別。某病於不能詩也。故敘此於簡首。以道吾私云。

急流勇退詩序

井菴林先生貴實。莆人也。起家進士官六察。經學行誼。推高一時。其立朝有氣節。侃侃論事。不畏權貴。其董畿內學校之政。以平生所得忠孝爲教。士類翕然宗之。居無何以疾在告。蓋家貧者十餘年矣。茲復奉命來按兩浙。理鹺法。剗政之疵。剔民之蠹。威行惠孚。商農皆悅。未朞月。事皆就緒。凡咨諏所及。知無不言。前後所陳時政數十事。多見施行。衆方仰其有爲。而先生又以疾作。屢抗章乞致其事。命未下。聞代者至。

遂不復造朝。亟遣人繳納其璽書符印。而飄然以歸。時先生春秋五十有九。入仕踰二十載。而在職者僅兩考。嗚呼。其可謂難進易退者矣。外臺諸公重其去。咸賦詩爲餞。而題其卷曰。急流勇退。蓋取宋錢宣靖公若水故事。而云然也。詩旣成。提學憲副以某嘗受知井菴。俾爲之序。某辭不獲命。乃作而言曰。世之仕者。莫不易其進也。而君子每難之。莫不難其退也。而君子則易之。其進其退。天下國家輕重係焉。夫豈徒哉。如或進焉。決性命。饜富貴。不能有爲於當世。退焉。亂大倫。羣鳥獸。不能有補於名教。惡在其爲進退也耶。姑以宣靖之事明之。方其進而佐同州。直玉堂。副樞密也。政事文章。謀猷諫諍。傑然有聞於時。固非徒進者矣。又其有感於呂蒙正。劉昌言之事。而蹤脫富貴。若將俛焉。亦豈苟焉而退者。有宋三百年。士風之美。重道義。輕爵祿。難進而易退者。皆自宣靖倡之。而文信公之孤忠大節。又嘗有慕於宣靖之爲者。則其有功名教。豈下於桐江一絲扶漢九鼎者哉。夫以宣靖之賢。進退皆可稱道。而麻衣獨以急流勇退目之者。謂退之益。尤有大於進也。觀諸宣靖。則知先生矣。安知異時難進易退之風。不自先生倡之耶。諸公之作。所以反覆咏嘆。深致其意者。得非有感於斯耶。世之議者不察乎此。顧乃以爲無故而苟去。矯俗而近名。豈其然哉。豈其然哉。雖然。宣靖之行高矣。道則未之盡也。士君子所當爲者。可但如是而已乎。古人有言。願無以此舉自滿。某也敢爲先生誦之。

民謠六詠序

莆陽林君居魯。文行甚高。而植志不凡。起家進士。爲吾郡節推。善於其職。民謹然誦之。乃三載考績。以治

最聞。召拜尙書工部郎官。去之日。郡中諸父老之賢者。咸惜其不可留也。相率爲歌詩。稱述其美。彙而成什。號曰民謠六詠。以贈其行。君辭之曰。沂以非材。試茲郡吏。朝夕惴惴焉。唯受直息事。以獲戾。父兄弟是懼。茲得免於罪焉。以去。吾之幸也。其何以堪。此不虞之譽乎。父老咸曰。行而有贈。古之義也。昔劉寵以會稽守。去爲將作大匠。山陰老叟持錢奉送。寵爲之選受一錢。蓋不於其物。於其情耳。今君侯志潔行高。吾儕小人。不敢以錢相浼。惟是樵歌牧唱。道其惓惓依戀之私。亦情之弗能自己者。君侯其忍愀然於吾民乎。君乃笑而受之。庠序之士。董遵雅善於林君。乃持是詩而來告曰。斯亦吾邦之盛事也。在謙之九三。勞而不伐。林君以之。在益之九五。有孚惠我德。吾民以之。二者皆可書也。蓋爲之序而待之。庶異時有陳詩而觀風者。尙有攷焉。嗚呼。古之良吏。以治得民者。往往播諸謠咏。若鄭有輿人之誦。魏有鄴民之歌。與漢世漁陽桑麥。蜀中之襦袴。是已。世衰道微。吏無善治。誦聲之不作久矣。君爲一郡法曹。而遺愛在民。章章若是。況於守專城位方岳乎。其亦庶幾古良吏之風哉。世之好名者。孰不侈是以爲美談。而辭之不自居焉。其志爲何如也。豈未足於吾民之謹虞。而欲其皞皞者乎。是何止於勞之不伐而已耶。吾知君之去此而羽儀於天朝也。必將以王道左右吾君。布宣關雎麟趾之化於天下。而一其道德。同其風俗。使二南之作。康衢擊壤之音。復興於今日。視彼列國兩漢之吏治。風斯下矣。而奚以區區之六詠爲哉。君行勉之。予日有望焉。姑序是詩以爲之兆云。

送賀教諭深歸永新序

永新賀先生宗濬。蚤受易於故禮部尚書翰林學士文安劉公。講學爲文。皆有師法。由江西壬午鄉薦。登進士乙榜。歷魚臺應天司訓。再轉而教諭蘭谿。至則嚴條約以課諸生。凡先王詩書禮樂大小學之教。靡不相與誦習而服行焉。學者喜於得師。爭相奮勵。考德問業。期於有成。夫何一日。先生揖諸生而告之曰。吾否德。罔以模範多士。顧老且病。又弗克夙夜勤而於學。吾其歸哉。矧吾兄弟分異久矣。茲將奉先人遺教。脩陳江州鄭浦陽家法。合千指同爨以食。吾於先人爲嫡。於兄弟子姓爲長。凡家之祭祀婚冠。若外內細大之政。皆吾尸之。匪躬之行。曷儀刑於我後人。吾必歸矣。諸生相顧駭愕。有若寒之褫裘。涉之亡楫也。相率謁邑宰。郡守。部使者。丐留甚苦。諸當道者諭留甚至。先生皆不顧。竟治任歸。朱隆。姜麟輩。以十年老門生。弗勝其惓惓慕戀之私。乃走予山中。徵言爲贈。予辱先生知最舊。且嘉其去。不容默也。乃喟然嘆曰。善哉。先生之歸。其爲教也大矣。人之言曰。仕而不得其職。則去。古之義也。今諸生之愛慕。與當道之勉強。先生非不得其職者。胡爲年未及謝。遽請納祿。若是其怱然乎。豈青氈絳帳。弗若長枕大被之安。且適耶。抑亦子弟之樂父兄。有甚於英材之樂育耶。予獨以爲未然。古之君子。不出家而成教於國家。之不教。如教人何。先生之去位而家教者。夫豈忘情於諸生哉。亦以言教之弗如身教。欲學者歸求之有餘師耳。唐陽城以進士歸隱中條山。兄弟友愛。奴亦化之。薰及晉鄙。悉爲善良。及爲國子司業。而生徒斤斤。皆循法度。禮順克彰。孝弟以興。其教之不肅而成者。自家始也。陽公由其家以教於國。先生則以教於國者反歸其家。所施之先後不同。道則一耳。諸生有得於是焉。必知天倫之重於人爵矣。必知仁民愛物之始於親

親矣。必知士君子之貴乎難進而易退矣。其爲教顧不大耶。先生歸矣。尙益修孝友之政。以御於家。以化於鄉。則西江之上。豈無薰其德而善良。若晉之鄙人者乎。明良在上。寤寐英猷。又豈無用陽公故事。以銀印赤紱。卽隱所起先生爲諫議。爲司業。而教成於天下者乎。若然。則其教之所及。不但吾黨之士而已。斯又予之所深望者。故因爲別。而致其愛助之言。離索之懷。所不道也。

追送謝侍講鐸赴召後序

聖天子肇位四海。弘闡大猷。聿隆繼述。詔起侍講。謝先生於家食。以修憲宗皇帝實錄。先生如京師。取道吾婺。中書王舍人允達。率諸士友。祖餞雙溪之澗。衆各爲詩以侈其行。王君旣以先生出處之義法乎聖賢者。序其前矣。然引而未發也。某辱知先生最舊。適有他故。弗遑走送。意甚缺然。將欲贈之以言。而茲行之端由。非淺薄所能識也。敢推本王君之論。而質諸先生可乎。昔夫子志在春秋。行在孝經。斯二者。何休所謂聖人之極致。治世之要務也。世之君子。莫不知宗孔氏。而要其志行所歸。有弗畔焉者寡矣。先生少明孔氏經。取進士高第。官翰林。以文章名海內。旣而有所不樂。逮遭喪而歸。以疾在告。杜門著述。殆將十稔。作會總亭於祖塋之側。以尊其祖。以親其族。凡所以修德立功。揚名顯親者。莫非從事於孝經之行也。其在先朝。嘗與修英廟實錄。稽合同異。褒貶得失。書法嚴謹。無愧良史。今茲聞命。又幡然出當載筆之任。非有春秋之志者耶。處非徒處。孝經其行。仕非苟仕。春秋其志。彼以猿驚鶴怨爲疑者。烏足以知先生哉。是行也。綉金匱石室之藏。綜邦國四方之志。揚洪烈。彰緝熙。表忠直。黜奸佞。大書特書。上成皇明一經。以

續麟筆之絕。以幸天下後世。謂爲善學孔氏者非耶。雖然猶未足以究其志也。吾夫子之作春秋。蓋有不得已焉。今先生上遇堯舜之君。前席召對。從容啓沃。凡春秋之悼典庸禮命德討罪者。一一見諸行事。以措斯世於唐虞三代之盛。非反袂泣麟之比。豈徒曰志之云乎。先生其尙以春秋之筆。而竄定典謨之書哉。不然。則以行止驗天機。若朱子送籍溪之云者。亦莫不有孔氏家法存焉。於先生何病乎。然非所望於今日者也。先生行哉。某與天下蒼生同一引領。

送中書王舍人汝赴召詩後序

嗚呼。三代而下。儒以無用而取人之鄙薄。訕笑者衆矣。非儒之無用也。儒焉非儒。而盜名欺世之不足爲用也。安得真儒之効。一白於天下。而刷此恥哉。吾友中書舍人齊山王先生允達。自其先南稜先生。得考亭再傳之學於其外祖通齋葉先生。以儒名家者數世矣。至待制忠文公。始以文章鉅儒。受知太祖。而身歿王事。弗究厥施。博士公將繼志焉。而享年弗永。皆未覩爲儒之効。譬之火焉。久鬱必發。譬之水焉。久蓄必流。其有待於先生乎。先生世其儒學。以科第起家。官鳳閣。典絲綸。在帝左右。令聞日昭。且駸駸乎顯庸矣。而志有不爲。以病免歸。豈天意猶有所待耶。今天子出震繼離。召用羣儒。一新庶政。慨然有意於唐虞三代之治。時在廷之臣。有以先生文行爲言者。部符下郡縣。促令供職。先生猶以疾辭。而郡邑之大夫交勸駕焉。不得已。乃起而就道。吾鄉諸士友喜相告曰。儒道其亨矣乎。爰卽其道路所經。分爲十詠。各賦詩以壯其行。先生過予言別。出以相示。某於諸君之言。竊有感焉。昔蘇太史平仲。謂人之出處皆天。其處而

修身。出而行道。則人之所以奉乎天也。故儒之未用。其責在天。用之而弗覩其効。無以奉乎天者。其責在人。天人交至。則其道有弗亨者耶。今先生之歸。未嘗有意於出。而以公論驅之出焉。豈非天乎。天其或者一試用儒之効於今日。則先生之出。夫豈徒哉。但嶢嶢易缺。皦皦易污。盛名之下。其實難副。先生之出。亦良不易哉。唯先生宏遠謨。以裨新政。奉明主於三代之隆。毋使儒爲無用。而起人之鄙笑。斯足以奉乎天而無愧矣。先生其敬念之哉。所以倡前人之業。副友朋之望。爲儒道之光者。不在茲行矣乎。某之辱游於先生。非一日矣。敢竊取古人以規不以頌之義。而書此於末簡。以道其惓惓愛助之私云。

送穀齋林先生典之鄖陽序

人情莫不厭常而好異。故天下之事。往往廢於常而成於異。蓋常者其故。異者其新也。故者人所習見而玩之。故厭且忽焉。而其事以廢。新者人所創見而貴之。故好且趨焉。而其事以成。若風雲雨露之在天。走飛草木之在地。皆人所常見而玩者。一有甘露之降。慶雲之見。鳳麟朱草之生。則莫不爭先而快覩焉。以其新而異也。在物且然。而況人與事乎。國家故典。凡學政教誦諸文學官。必歷滿九載。而謁選於吏部。課其最者。乃陞教授。此用常制以待常材。人不之貴也。今天子厲精治理。誕敷文教。謂學校風化之原。教授學官之長。匪得其人。民罔視校。爰命天官。妙簡學行優異之士。不循常資。而擢爲教授。以責其成。蓋始異其制也。時則穀齋先生林君汝惇。由西安教諭。未滿考。而躡拜鄖陽教授。非以卓異之材。而膺茲異數者乎。故士林雷動而歆慕焉。鄖故爲襄陽屬縣。僻在西南。人稱土曠。而天下之流民萃焉。異時嘗有竊弄潢

池之兵者。至煩六師以戡定之。頃年以來。始歸皇化。而悉附於版圖。物衆地大。由是陞爲郡焉。其郡新設。其民皆新附之民。非得於素教而預養之者。先生以新制所用師儒。而臨新設之郡。教新附之民。其事皆異於常焉。則其爲教。必將有出於尋常舉業之外者矣。昔安定之教。蘇湖時俗多尙辭賦。而獨明體用之學。故士風爲之不變。人材皆適於用。而棟梁榱桷之頌興焉。夫湖學之體用。不外乎聖賢。大學自新新民之道。先生素所蓄積也。推其所以淑諸人。舉舊染之污。而一新之。使鄙陋之俗。化鄒魯之風。則其成功之美。必有大異於常者。奚止爲文翁之蜀。常袞之閩而已哉。所謂事之成於異。不在茲乎。其門人以某之辱游於先生。最久且故。而來徵贈言。某竊惟先生家學淵源。與文行之懿。焯焯乎在人耳目。不暇言矣。而區區稱頌惜別之常語。又不足爲先生道也。惟是鄖陽之行事。異於常。故欲先生有以成其異者。使天下後世知君子之所爲。果有異於人焉。先生其以愚言爲然否。

送吾教諭翁之天長序

開化吾君廷順。登進士乙科。授天長教諭。將迎其尊翁文山先生。以就養。謂子辱游於文山。有世契之厚也。過而言別。丐言爲贈。昔房景伯以身之事母。化貝邱。則君之爲教得矣。子何假於言哉。天下有至德要道。得於降衷。秉彝之初。發於良知。良能之天。不堯存。不桀亡。體之身。而身修。行之家。而家齊。推之國。與天下莫不治。且平者。其惟孝乎。孝之云者。豈徒溫清旨甘。以養口體而已哉。必始於事親。中於事君。而終於立身。自其體髮不毀。以至於發言制行。居處動作。衣服飲食。皆不敢有虧於道。以辱其親。自家。入兄弟之

咸宜。朋友之信。以至於事君而忠。事長而順。涖官而敬。臨民而仁。皆足成名。以顯其親。夫然後謂之能孝。所謂一德立百善從者也。先王庠序學校之設。皆以申明乎此。司徒六行師氏三行之教。必先乎此。其朝夕從事於詩書者。所以講究乎此。肄習於禮樂者。所以節文乎此。而樂乎此也。凡士之所以爲學。豈容外此。而求之他道乎。故常其時。成人有德。小子有造。若君陳以孝友佐成王。化東都。張仲以孝友事宣王。致中興。其治俗美。非後世所能及者。謂非師得其人。而教得其道乎。三代而下。吾惑焉。建學立師。徒應故事。設科取士。專尙虛文。呻吟佔畢。以爲學。風雲月露。以爲文。富貴青紫。以爲志。學術之壞若是。而望其有成材難矣。惟我聖祖憲天立極。悉屏前代之陋習。而遠紹三王之遺軌。合天下郡縣。而學校之萃。天下俊茂而教育之。其頒聖誥。訓臣民。獨詳於明孝之章。列聖相承。而申以孝順五倫諸書。嘉惠萬方。其降化美俗之意。蓋與古之徵五典。修人紀。而敘彝倫者。異世同符也。而今之職教事者。往往以操鉛槧。課誦讀。工文詞爲務。未免因循故習。莫能深體朝家教學之意。豈不重可嘆哉。天長爲中都屬邑。密邇皇化。最先且久。其俗素稱醇厚。其人昔有朱壽昌者。以孝聞天下。而歷官所至。皆有善政。流風餘韻。豈遂泯乎。今君奉親而臨教。是邦祿養之外。凡可以致孝。無不爲焉。然後推所得以淑諸人。又因其俗所固有者。而開導焉。振德焉。則人心同然。自我發之。孰不感奮而興起乎。異時教化成。而人材盛。風俗美。必將有出乎舉業文字之外者矣。君其勉乎哉。

送韓太守燾入覲序

吾婺爲浙水東劇郡賦煩役重民隳健訟素稱難治守牧之任恆艱其選迺弘治丁巳平鄉韓公宗仁以尙書憲部郎中惟良折獄廉慎有聲式膺推選來殿是邦始下車剗弊澣汚視民之所欲惡而罷行之不爲苛察鉤鉅驚愚駭俗以取一時之譽惟行所無事而田里晏然無愁嘆聲其可謂樂只君子者矣簿書獄訟之暇輒以興學育材爲務引見諸生論談經義從容反覆聲聲不倦使人咸有所得尤可謂載色載笑匪怒伊教者矣夫何涖官朞月威惠始孚遽有述職之行介圭入覲出祖有日諸生某輩羣造於子曰公之膏雨吾土襦袴吾民而譽髦斯士者古良二千石弗能過也今而車馬有行色先生可無一言以道離別之懷以致期勉之意乎某應之曰古者諸侯來朝爲天子所予則有車馬袞黼之錫彤弓彤矢之賜漢唐守臣亦有以政績優異承褒寵者今婺郡聖朝方大明黜陟之典請以前使君溫王二公之加賜金紫者而祝公可乎生曰此公之所固有不假言也某曰唐虞巡朝之典奏言試功周禮朝宗之日圖事陳謨近代守臣往往有赴闕論事以生民休戚上聞者今聖明方下求言之詔請以前使君蘇洪李趙諸公之福吾民者而祝公可乎生曰此皆公所樂爲不容贅也某乃作而言曰昔仲山甫徂齊之行吉甫贈詩以遄其歸蓋以王躬之保衰闕之補係於山甫不可久於外也今我公朝會京師雖不久於行然棠陰老稚仰公以宅其生泮水俊髦待公以卒其業者惟恐廟堂虛位帝心簡在公歸而不獲焉其惜別願留之情皇皇焉不能已所謂無以我公歸兮無使我心悲兮者也則公之是行奚可久於朝耶請以出車之首章爲公而三復焉可乎衆皆曰此正吾徒與千里蒼生所深願也幸書以告公尙無忘竹馬之期哉

送牧給事中考績序 癸亥南雍作

官以給事名肇自秦漢不過爲博士議郎之加官以備顧問應對而已其職尙輕隋唐以來始居門下以省讀奏案駁正違失至宋則凡制勅有不便者皆得封駁塗歸而三司詳決失中則權其輕重發驛遣使則審其事宜六品以下奏擬則校功狀駁最每季終奏駁正之目而其職始重然匡弼獻替以補衰職之闕者又別有諫官焉非其責也迨我聖祖憲天立極法周六典建官特設六科給事中以爲近侍則不專封駁而兼諫諍之任凡公卿謀議大政皆得預聞則其職尤爲清要而責任尤重矣若南京六科則留都事簡駁正亦稀而專以言爲責國家倚爲赤幟所謂言及乘輿則天子改容事關廊廟則宰相待罪者也居是職者豈不難其人哉姚江牧君時庸學博行端而事母克孝遇事敢言剛方直諒之士也以進士高第選授南京兵科給事中屢有建白多切時政克舉乃職聲望甚都弘治癸亥冬十月秩滿三載將奏績於朝其同官李君某暨諸鄉士大夫華其行相率具酒殺祖餞都門外以予與君有鄉曲之雅而屬以贈言昔陽亢宗爲諫議而退之有論范希文爲司諫而永叔有書皆盡朋友箴規之義厥後二公卒以諫顯謂非贈言之助耶今韓歐之言具在方冊世所傳誦牧君亦旣習聞之矣尊所聞行所知尙奚假於予言哉況君在南都蹇蹇諤諤不少顧忌天子知之久矣今而入覲黼座咫尺天顏必將明目張膽敷闡大猷以聳動四方其肯使陽范二公專美於前耶某也衰老無似莫能致其愛助之意惟願爲今日之張萬福以稱賀太平而已亦奚假於言哉

送萬太守福之金華序 乙丑九月

弘治乙丑之夏。聖天子龍飛御極。渙大號以新百度。覃沛澤以沐羣生。仁已至矣。猶慮田里之間。容有不獲其所者。而妙柬廷臣。出爲司牧。於是南京刑部郎中進賢萬公季崇。有金華之命。凡吾郡之士。宦學於南都者。莫不悅喜。相率以送其行。而大理程君瑞卿。屬予贈言。昔韓昌黎之送陸欽州。以爲陸君之道行乎朝廷。則天下望其賜。刺一州則專而不能威。不宜先一州後天下。而曰無疾其驅。以致願留之意。曾南豐之送錢婺州。則曰純老文章學問過人。宜在人主左右。與訪問。任獻納。不宜久外。而欲其歸仕王朝。是皆以天下爲心。而發明士大夫之公論然也。今吾儕之送府公。則異於是。金華古稱文獻之邦。其民敦龐其習醇厚。而比年以來。賦繁役重。俗澆健訟。爲政者恆病其難治。斂愈急而賦不充。法愈峻而訟益滋。民之憔悴甚矣。其望賢使君之至也。若倒懸之求解。執熱之願濯。枯槁之渴思。時雨焉。公胡可不疾其驅。而贈行者可式。遄其辭乎。公早以明經登第。而材識通敏。志行高潔。始副兩淮鹽司。著勤能之譽。及居憲部。而折獄惟良。有猷有爲。隨試輒効。以是而往涖金華。所謂老手之劇郡也。雖其財賦之夥。訟牒之煩。殆有不勞而治者。又因其所固有。而觀風設教。鑄頑成仁。以復故宋文獻之舊。則雙溪之月。爲公而益明。八詠之風。因公而愈清矣。此則吾人之私情。惟欲一州是先。而天下不遑恤焉。方今聖明急於用賢。大臣公於薦賢。凡牧守藩憲。以治行聞者。莫不人登臺部。以佐理萬機。恢宏大化。有若公之材猷。而治有成績。則其進而行乎朝廷。澤乎天下。殆若階而升焉。可計日而待矣。又安有久於外服。專而不成者耶。若是則吾人

之私情既愜。而士夫之公論亦符矣。公其勉乎哉。某也衰朽不文。莫能致其愛助之意。聊布所懷。而以韓曾之言爲公。而三復焉。諸君子以爲何如。程君曰。得之矣。請書以志別。

送陳僉憲之福建序

福建古閩夷也。在周爲七聚。漢嘗徙其民於江淮。而吳亦以處遷謫之人。晉唐而後。風氣始開。生息日繁。民物殷富。壤地二千餘里。遂爲東南鉅藩。常衰興學。而曼胡之纓。化爲青衿。固已家庠序人詩書矣。然山區海聚。舊俗猶未盡變。往往觸法抵禁。易動難安。號爲難治。前代嘗選用文武才智之士。授以八郡兵民之枋。而建牙分闢以涖焉。所以輯衆庶弭奸強也。我國家統一宇內。綱紀四方。以閩爲邊徼重地。藩憲之任。恆慎其選。近年以來。又以汀漳二郡地兼山海。西隣贛吉。南接潮梅。其民剛愎好鬪。悍強弗率。尤爲難治。憲臣行部。時一至焉。而弗克久居。則姦宄無所畏忌。或伺隙而爲患也。又特設提督兵備。按察僉事一員。居守其地。使之聽於無聲。視於無形。而逆折其萌芽。以爲久安長治之道焉。聖天子肇位四海。厲精治理。深燭民隱。急所先務。妙東廷臣之有才望者。以司風紀。於是陳君勉之。由南京大理寺正。出僉閩憲。而往涖汀漳。督兵備焉。其友某等。過予而言曰。陳君世家吾浙上虞。厥祖若考。皆業儒。其伯氏正之。起家進士。而宰將樂。甚有治聲。其季茂之。亦領鄉薦。有才名。君第丙辰進士。歷官理評。副正有年矣。律已廉勤。宅心公正。詳練律令。能考立法之意。而周旋操縱。扶善懲惡。咸中物情。獄經其讞者。莫不稱平。其處同官羣而不黨。閒有所見不同。或事有掣肘難處者。必從容辯執。歸於至當。而後已。一時大理卿佐。咸器重之。以

君之才行而居是職。固所優爲。吾黨之士與之游者。莫不惜其別。而將有望焉。願丐一言以華其行。予竊以爲朝廷命陳君持憲節而督兵備者。非謂其練習法令。能折獄而致刑也。蓋將期之於無刑耳。亦非謂其蘊抱雄略。能執訊而獲醜也。蓋將備之以不兵耳。彼汀有龜山讀書之岩。漳爲晦菴過化之邦。其地雖險遠。其俗未必皆不善也。間有愚民迫於飢寒。困於征求。而嘯聚梗化者。亦由民牧不職。而御失其道耳。豈其人性然乎。吾聖人有言。欲善而民善。雖賞之不竊。蓋必有陰驅默化。使之遷善遠罪而不自知者矣。夫豈假於法律兵威之用哉。龔遂之於渤海。祝良之於九真。張綱之於廣陵。皆以單車獨行。而化暴爲良。是乃不刑而治。不兵而備者也。昔吾越先正呂公升者。嘗僉閩憲。仰天一祝。而害稼之螟盡死。則天可格。而物可感矣。又何寇盜之不化。而以兵備爲哉。君其勗之。所以嗣先聲。揚休聞。而副友朋之望者。不在茲行矣乎。某也衰耄無似。不斐之詞。無足爲君軒輊。敢以吾夫子之言。前數公之事。爲君而三復焉。諸君子以爲何如。衆皆曰。此固陳君素志也。請書以遺之。

送羅司業欽順侍親南還序

少司成泰和羅先生允升。由內翰來官南雍。卽迎其嚴君栗齋先生。以就養。旣二載。而栗齋以桑梓久遠。松楸在念。有歸志焉。先生則以栗齋高年遠涉江湖。而二季皆官於外。乏人侍養。乃疏請於朝。得賜假。送親南還。太學諸寮屬。以爲先生是行。實關世教之重。非但爲家慶之榮也。爰各賦詩。以華其行。謂某於同官。有一日之長也。俾爲之序。嗚呼。天下有至德要道。得於降衷秉彝之初。發於良知良能之天體之身。而

身修。行之家而家齊。推之國與天下。無不治且平焉。守約而施博者。其惟孝乎。先王庠序學校之設。皆以申明乎此。而司徒六行師氏三行之教。必先乎此。其朝夕從事於詩書者。所以講求乎此。肄習於禮樂者。所以節文乎此。而樂乎此也。士之所以爲學。豈容外此。而他有所事乎。特患所以教之者。無其本耳。昔唐陽城以其孝友。薰襲里閭。及爲司業。而教學者以忠孝有三年不歸省者。斥之。由是羣生聞禮。後學知孝。而忠義之士。若何蕃。輩皆出其門。國家卒有賴焉。謂非本之身教而致然耶。今先生以詞林魁彥。膺師儒之任。其教道之善。職務之修。立身揚名。以顯其親者。固無不至。而迎養其親於是也。朝夕左右。夔夔齋慄。先意承志。以悅其心。非徒旨甘溫清。以奉口體而已。茲復親導安輿。錦歸故里。則所以尊其親者。又有加焉。今聖天子厲精政理。圖任責成。凡羣臣以他事乞歸者。皆莫之許。而於先生侍養之奏。卽允其歸。豈非欲以孝治天下。而重先生之身教乎。先生行矣。戲綵高堂。薦羞先壟。靡有不孝。自求伊祐。竣事而來。陰感默化。則濟濟多士。寧無克廣德心。而興於孝弟者耶。殆將有德有造。不肅而成。必有若君陳張仲者。出而媚於天子。以弼成孝治。視彼陽城之生徒。斤斤皆循法度者。不足言矣。某也親旣歿。而年已邁。孝有不及。弟有不時。欲爲先生之行。不可得。徒切慨嘆。無足爲教。願因先生之教有成。而幸逃尸素之責焉。故書此於簡首。以道吾私云。

送鍾參政之雲南序

浙藩大參吳公黃公書謂某曰。吾同官鍾公元浦。世家廣之東莞。以明經舉進士。授刑科給事中。歷吏兵

工諸科。累官至都給事中。器識不凡。而通達國體。諒直敢言。嘗糾正京倉羨餘。民以爲德。平反山西疑獄。人稱其平。奉使遼陽。則罪闕臣之失律。守臣之納侮。而劾罷中貴之怙勢專利者。皆稱上旨。在諫垣十有餘年。聲聞卓然。方負公輔之望。而逆豎擅政。沮抑言路。出爲浙江左參議。分守溫處金衢諸府。公不以外補爲嫌。勤恤民隱。振肅吏治。未幾而威惠大行。民甚賴之。會朝廷一新大化。簡賢圖治。遂拜雲南參政之命。萬里之行。自此始矣。願吾子一言以壯其行。某叨受滕廩。稔聞佳政。且辱公知遇良厚。其敢以耄荒不文辭耶。竊惟聖朝混一區宇。法古爲治。建牧立監。自畿甸外。分設十三布政司。以統轄郡縣。而一其政教。有布政使爲之長。而參政參議爲之貳。蓋卽方伯連帥之任。其位隆而責重。苟非材望之素著者。不輕受也。況雲南僻在徼外。百蠻所居。王化未嘗及焉。漢武征伐四夷。始通中國。置吏奉貢。厥後叛服不常。自唐中葉以迄於宋。又爲蒙氏段氏所據。迨元而後。乃入版圖。其地方數千里。北接吐蕃。南鄰僂蠻。蒲獠。種類不一。椎髻披氈。金齒綉面。鳥言獸行。不知禮義。而鬯訟好鬪。自昔號爲難治。我國家仁漸義磨。百有餘年。舊俗猶未能盡革。故仕者往往憚其僻遠。又或以爲夷俗不可以中國治之者。類皆鄙視其民。苟事羈縻。至有反變爲夷者。殊不知惟皇降衷。性同一善。初不以夷夏而殊。故箕子流化朝鮮。而孔子不陋九夷。天下豈有不可變之俗。特患所以治之者無其本。不能用夏變夷耳。昔文翁在蜀。而蠶叢鄒魯。常袞在閩。而曼胡青衿。其在是邦。則孔明所營。皆習中土之禮儀。梁毗哭金。而息蠻酋之攻擊。之數公者。雖未敢仰望箕子之仁。而皆能用夏變夷。著偉績於當時。流芳聲於後世。非得其本而然乎。今鍾公。司獻納而言信。

於上職。旬宣而政得乎民。殆必有所本矣。由是而往。洩瀆南。益推其平日所學。箕子洪範孔子六經之道。以施於有政。柔遠能邇。使蠻區寇壤。皆去其頑犷暴戾之習。爲詩書禮義之歸。則漢唐諸公。不得專美於前矣。他日政成而歸。進位臺省。推其所學。左右聖明。經綸密勿。弼成大化。比隆於唐虞三代之盛。又奚止於一方之化而已哉。此又某之所深望者。

送趙副使鶴之山西序

近齋趙先生叔鳴。廣陵人也。學博而才贍。抱負不凡。以明經舉進士。爲尙書戶部郎官。嘗佐大司徒經理財賦。足國裕民。聲稱翕然。及出守建昌。佐南安。亦以最聞。乃正德己巳。始來吾婺。以其郡劇而難治也。厲精庶務。凡前政之未便。與奸胥猾民之蚤緣官府以謀利而病民者。皆剔而去之。凡舊俗之好鬪訟。崇戲劇。悅淫妓。與婚嫁侈費而女生不育者。皆禁絕之。禁雩水旱。則反躬自責。而有禱輒應。寬恤災傷。則封章屢奏。而逋租是減。廣儲蓄以備賑貸。覈欺詭以正版籍。皆實政之及民者也。謂金華爲文獻舊邦。號小鄒魯。而今不古若。乃選取諸邑髦士。肄業郡齋。躬爲講授。而造就之。以東萊與何王金許五先生。倡明道學。則訪其遺書。集其遺文。刊示學者。使知所趨向。以宗忠簡潘默成之忠清。世所尊仰。則表其里居。使人有所視效。又使諸生講行鄉射冠祭等禮。及肄習釋奠雅樂。皆所以興禮義化民俗。欲復昔時文獻之盛也。越二載。政教始孚。而先生忽進位臺憲。奉璽書往董山西學校之政。出祖有日。郡諸生某輩。荷教甚厚。咸惜其去而不可留也。乃集其治行之焯焯者二十餘事。分題賦詩。以頌其遺愛。又相率造于山中。丐言以

贈其行。予觀先生在金華。以東萊五先生之道學教諸生。則所以爲教者。得其道矣。卽其已然。而推其將然。尙奚假於予言哉。夫山西卽古之冀州。堯舜禹之故都。皆在焉。三聖相授受。以精一執中爲修己治人之要道。三代聖王。以及孔曾思孟之所傳者。皆是道也。而程朱大儒。與吾金華五先生之所推明者。亦不外乎是道焉。舜命契爲司徒。敬敷五教。而皋陶明刑。以弼五教。使民皆協於中。故當時五典克從。九德咸事。至於比屋可封。人人士行。其人材之盛。風俗之美。卓冠千古。莫非是道作人之明効也。厥後隋之王通。剽竊其緒餘。以中說教授河汾。爲多士所宗。其門人房。杜。魏。徵。輩。柄用於唐。亦足以輔成貞觀之治。彼小用其道者。且若是焉。而況有大於是者乎。聖天子東命先生。董教是邦。豈非有意於唐虞之治。欲自其故國而始耶。教成一二。而風行天下。直易易耳。其所望於先生者。不亦重乎。先生往蒞是邦。以三聖相傳之道。啓迪後進。使其朝夕乾乾。進德修業。爲孔顏之博文。曾子之格致。子思孟子之明善。以求其精。爲孔顏之約禮。曾子之誠正。子思孟子之誠身。以致其一。而不徒爲科舉文字之學。則可以希賢希聖。而執中之道在是矣。先生以是倡之。則士生於三聖之故國者。寧不奮然而興起乎。異時教道有成。英材輩出。或爲臬益而陳謨於上。或爲稷契而宣力於下。致吾君於堯舜。措斯世於唐虞。庶幾不負所學。不負聖明之東任矣。先生行哉。予竊有望焉。

送吳參政之四川序 乙丑九月

聖朝之制治天下也。以幅員之廣。郡邑之衆。自畿輔外。分爲十三布政司。以統御之。爲國家之藩屏。其責

任至重且大。蓋卽虞之十二州牧。周之方伯連帥也。其設官也。有左右布政使。及左右參政參議焉。然布政以一二人總政於內。二參則分守列郡。而旬宣於外。其事最劇而加勞。凡教化之興廢。風俗之美惡。財賦之盈縮。徭役之輕重。獄訟之聽斷。與夫簿書期會之類。皆分守者之所親理。非材猷之超卓者。莫堪其任。故朝廷之授是官。每艱其選。而士大夫之得之者。尤不易也。一或得焉。人莫不爲之喜。且樂者。以其官職之崇。不數載則進爲方伯。爲都憲。而廟堂之位。可馴致也。予則以爲君子欲之。而未可以爲樂也。蓋雖志可大行。澤可遠施。爲吾之喜。然必能使其所臨之邦。教化以興。風俗以美。財賦以充。徭役以均。獄訟以清。而軍民無不得其所焉。以樂吾之樂。則吾之職可稱。責可塞。不負朝廷委任。而後足以保其位。而可樂矣。不然。則人將賄附。皆讒以作慝。而來曠官之責。吾欲求免其過。且不可得。而何以爲樂耶。是則參政之難爲。又有甚於所難得也。金陵吳君汝和。以地官副郎。擢守荊州。仁而明。敏而通。歷七載。而八受褒旌之寵。天官賢其人也。遂舉以參四川之政。夫川蜀與荆爲鄰。其民情土俗。不甚相異。能以其治荆者而治蜀。雖兵民有衆寡。土地有廣狹。亦不過推其所爲而已。夫何難哉。則汝和不惟得其所喜。而又進於樂矣。予友僉憲徐君用美。於汝和爲媼姪。以其將之官也。丐予言以爲贈。予因推人情之所喜。且樂者。而汝和獨無愧焉。因以慶夫蜀人。其亦有所喜也夫。其亦有所樂也夫。

送周宏毅還淳安序 甲午年

昭陽大荒落之歲。予承乏來僉閩憲。時憲長洪公。副則應公。皆世家淳安。蓋吾鄉之先達長者。重厚老成。

明習世故。私竊有幸。獲以職事相從。諸凡政有未通事有可疑者。得以諮而處焉。過辱二公。不鄙晚進。相視特厚。且日同署公牘。洗冤澤物。退則從容私室。敘鄉曲之雅。煖茗清話。意未嘗不歡然相得也。已而又識周公宏毅于洪公所。蓋公之淑人。宏毅女兄也。淑人從公久宦於外。宏毅篤念同氣。不遠千里而來省焉。其爲人端謹質實。讀書尙義。有古隱君子風。公雅重之。居無何。宏毅買舟將歸。洪公應公咸謂予曰。宏毅歸有日矣。盍爲一言以相其行。予乃作而言曰。浙之於閩。雖曰壤地相鄰。而有崇山之限。迅湍之激。昔人所謂雷霆入地。建溪險星斗逼人。梨嶺高信矣。又其風氣頗殊。水土亦異。行者往往或憚其難。非夫宦游之士。商利之儔。罕有至者。吾聞昔宏璧之副閩憲也。宏毅時省其兄。嘗一至焉。今以姊氏之故。復爲此來。其心非有名利之累。而僕僕焉躬跋履之勞。非其厚於同氣之愛。肯若是耶。人之大倫有五。曰君臣也。父子也。夫婦也。昆弟也。朋友之交也。宏毅之於兄弟厚矣。能充是心而達之於君臣。於父子。於夫婦。於朋友。以及宗戚鄉黨之間。靡一不致其厚焉。則於君子之道庶幾矣。某也無似。欲爲宏毅之厚而未能。請因以是而勗宏毅之行可乎。二公莞爾而笑曰。旨哉子之言矣。夫遂書以貽之。

送姜推官還南昌序

吾邑昔爲州時。知州有夾谷侯者。治甚得民。而不獲乎上。因以罷歸。先正禮部吳公。贈以詩曰。陋邦寧足駐旌麾。不待尋常報政期。宮有藻芹歌未已。囊無薏苡謗何爲。纍纍金印青雲在。落落丹心白日知。得意屏庸非所羨。祇留遺愛使人思。邑人傳誦至今。以爲美談。前郡守劉公惟馨。立朝有盛名。而爲政亦不獲

乎上被劾去官。其事與夾谷侯相類。予既嘗誦吳公之詩以美其行矣。今節推南昌姜君。發身儒科。來官吾郡。處事精審。斷獄明允。守武咸稱其能。悉以郡政委君裁決。邇因吾邑缺令。檄君蒞治。其邑物衆地大。賦重役煩。加以路當衝要。賓使紛至。供億勞費。民力不堪。素號難治。君爲之薄賦徭。省供應。清獄訟。恤貧乏。治豪猾。祛蠹弊。不兩月。事皆就緒。民皆悅之。亦可謂能其官矣。夫何當道者惑於萋斐之言而黜君。人皆爲之不平。君自謂吾居下位。不能善事上官。以失名譽。罪固當去。有母在堂。而懷祿遠離。定省久曠。罪尤當去。負茲二罪。去之晚矣。吾於人也何慊。遂忻然而歸。不以得失介意。尤見君之高致。吾焉父老聞君解組。皆悵然如失怙恃。莫不垂涕泣焉。相率過予。丐言爲贈。顧區區鄙陋之言。何足爲君輕重。而君之歸亦有類於夾谷侯者。敢仍借吳公之詩爲君而三復焉。以致惜別之意云。

送周樸軒歸上杭序

世之事親者。莫不欲有以榮其親。亦莫不欲有以養其親。然非名登黃甲。無以致其榮。非身食天祿。無以隆其養。能如所欲而榮養其親者。蓋亦鮮矣。夫黃甲固甚榮也。苟或不幸而居永感偏侍之下。則雖荷寵榮。親不及見。不能無風木之憾。必其具慶在堂。斯足爲榮之至焉。天祿固可養也。苟或王事靡盬。而將父將母之不遑。則祿雖可分。而身不侍側。又不能無望雲之思。必其迎親就祿。然後爲養之至焉。能得乎榮養之至。而滿其所欲者。不尤鮮乎。二者兼至。吾於邑侯周君之父樸軒見之矣。樸軒世家閩之上杭。其大父尙毅。以進士起家。官六察。有盛名。樸軒幼有良質。將繼志焉。而蚤失怙恃。累於幹蠱。弗克從事於學。乃

篤於教子。漬君就學邑庠。時加警勵。期底有成。以續先緒。君遂以妙年。魁鄉薦。登甲第。鄉人莫不嘉嘆。以爲有子。而二親在堂。壽考康寧。豈非榮之至者乎。迨君奉朝命。來宰吾邑。而明敏能斷。練達有爲。凡裁決政務。供億軍旅。修治城堡。皆不勞而辦。庭無留訟。賦無宿逋。監司郡守。屢行旌獎。可謂能其官矣。非有得於義方之教者乎。政旣暇。乃遣人奉迎樸軒。偕母氏。並臨官署。以就榮養。君以六百石之俸。賜而具其服食。以二百里之黎庶。而爲其孫曾。以緋衣墨綬。爲斑斕而戲舞。以激江之水。大田之秣。爲春酒。以介眉壽。凡可以悅耳目。娛心志者。罔不爲焉。則所以養之者。又極其隆。而無不至矣。居三歲。朴軒忽以桑梓久違。松楸在念。有歸志焉。會君亦以秩滿。將爲考績之行。乃不果留。而命其內子扶侍以歸。吾邑縉紳諸君子。某輩咸謂樸軒是行。使爲父者知所以教。爲子者知所以孝。大有補於風化也。不可無一言以華其行。乃相率賦詩。而過予。丐言爲贈。予聞樸軒嘗謂君曰。吾此來。非爲溫飽計。欲視汝居官行事。能不負所教。斯可矣。三復此言。則樸軒之所望於君者。不旣厚乎。夫孝子之心。無窮。而道亦無窮。彼以登第而榮其親。與得祿之養其親。亦云孝矣。然豈若治行著聞。而官位日崇。恩命下頒。推封所自。足以顯其親者之爲愈乎。又豈若立德樹勳。追配古人。休聲美譽。流芳青史。足以壽其親於不朽者爲尤愈乎。然欲進於是焉。亦豈待於他求哉。惟今日行政。推愛親之心。以愛民。而盡其仁。異日立朝。移事親之孝。以事君。而盡其忠。則治行無不著聞。勳德由是樹立。所以顯其親壽其親者。皆在是矣。樸軒之所以教。而君之不負所教者。又豈外於是耶。君其勉乎哉。予辱君知愛最深。故於樸軒之歸。不敢以他辭佞。而推廣其所以望於君者。以勵

君之志云。

新刊楊鐵崖詠史古樂府序 以下序羣書

昔蒙古氏之有天下也。治率用夷。而不師古。禮樂刑政。無足稱述。獨文章一脈。代有作者。未嘗絕響。若虞伯生。范德機。楊仲弘。揭曼碩。歐陽原功。馬伯庸。薩天錫。暨吾鄉黃晉卿。柳道傳諸人。各以其詩文鳴。莫不涵淳茹和。出入漢唐。郁乎彬彬。何其盛也。然其時衆作悉備。惟古樂府未有繼者。於是會稽楊鐵崖先生。與五峯李季和。始相倡和。爲漢魏樂府辭。崛強自許。直欲度越齊梁。而上薄騷雅。偉乎其志哉。至如詠史。則季和每推服鐵崖爲上手。鐵崖亦自謂余用三體詠史。用七言絕句體者三百首。古樂府體者二百首。古樂府小絕句體者四十首。絕句人易到。古樂府不易到。至小樂府則他人不能。惟吾能之。若此編所錄者。特其一體耳。成化癸巳。御史中丞江浦張公。巡撫閩中。涖政之暇。出示某而語之曰。鐵崖先生平日所爲樂府詩最多。今僅有存者。天官少宰葉公。與中。曩爲僉都御史。出撫東廣。嘗得其門人吳復所編若干首。已鈔諸木矣。近得此帙於前江西提學黃先生純之子知州璵。喜其詞古意古。可興可觀。讀之使人懲創感發。隱然有三百篇之遺風。特未得其全集耳。茲將刻而傳之。子盍爲序。某辭不獲命。乃復於公曰。自王迹熄而詩亡。一變而騷。再變而選。而樂府。而歌行諸作。至三變而爲律。作者徒知從事聲偶之間。而不能馳騁以極夫人情物理之妙。其去古也遠矣。獨先生之作。逸於思而豪於才。抑揚開闔。有美有刺。陳義論事。婉而微章。上下二千年間。理亂興亡之故。若指諸掌。而其命辭。皆卽史傳故實。鑿括而成。叶諸金石。

若出自然。昌黎所謂橫空盤硬語。妥貼力排募者。先生有之。是宜公之甚好。而欲永其傳也。雖然。鐵崖法乎漢魏者也。公且好尚之若是。如有國風雅頌之音。則其好之宜何如哉。公之於文詞。且欲復古。而況爲政。豈不欲行古道。而使今之天下。復於唐堯三代也耶。斯則某也。深有望焉。乃若先生名系爵里。與其文行之詳。見於宋太史景濂所爲墓誌者。已暴於世矣。茲不著云。

重刊香溪范先生文集後序

進士唐君尙虞之治蘭谿也。用儒飾吏。善於其職。克協上下。聲稱翕然。乃於蒞政之餘。閱地志。訪遺書。禮鄉賢。將以興廢舉墜。隆化美俗。於是香溪先生范公之後曰永昌者。出其家藏之集二十有二卷。蓋先生從子右史蒙齋之所類也。唐君讀而嘆曰。先生之文。世知誦習者。心箴而已。他蓋罕有知者。今觀其言。如以恥爲入道之端。以古之聖賢。未有不由悔而成。又謂學者覺也。心且不存。何覺之有。皆超然自得於學。極有警發。不獨心箴爲可取也。故朱子有不知從誰學之語。先輩謂其得於孟子者爲多。若先生者。豈非所謂豪傑之士哉。幸此集尙存。惡可使之泯沒而弗傳耶。爰命鉞梓。以惠學者。而俾某識其末。竊惟先生之學之文。與其立身大節。故侍郎陳公巖肖。禮部吳公正傳。序之詳矣。某生也晚。弗獲接聞前輩餘論。於先生所造。未能窺其萬一。尙何讚其辭哉。獨念吾鄉聖賢之學。前此未之聞也。而濬其源者。自先生始。繼而後有東萊兄弟麗澤之講授。又其後何王金許遂相繼。以得孝亭之統。道學之傳。於是爲盛。非先生之功而誰功。今當道學不傳之餘。而唐君復以先生之文倡焉。其所望於吾黨之士者不淺。豈天意又欲大

昌斯道之傳也耶。不然。何闕於前而顯於今耶。誦其詩。讀其書。而遐想其人於數百年之上。能無奮然興起者耶。此某於唐君是集之刻。所以重有感云。

東陽文獻錄序

昔潛溪宋先生於浦陽一縣之人物。既嘗爲之記矣。又取其人之所述作。緯俗經邦。可傳於後世者。類而集之。以爲文藝錄焉。使夫一言一行之善。皆得以垂於不朽。其所以表先哲而厲後人者至矣。浦陽文獻之足徵。蓋潛溪之力也。東陽爲吾婺望縣。古稱多佳山秀水。其清淑所鍾。瑰奇忠信材德之民。森然疊出。而述作之富。視浦陽爲尤盛。顧未有能裒集而登載之者。遂至磨滅散逸。存什一於千百。其不重可嘆耶。邑之士人杜儲公運者。故陝西憲副某之季子也。讀書好古。以東陽爲浙水東文獻之邦。而無所取徵。豈非邑之缺典乎。況先輩之遺風餘烈。與作者之殘膏賸馥。皆足以佑啓後人。惡可使之泯沒而無聞耶。乃發其家傳。訪諸士友。得唐宋以來諸君子遺文逸事。必手錄之。雖片言半簡之僅存者。亦所不廢。凡其邑之所產。孝者。忠者。節義者。勳業者。文學者。悉著其行能。與出處大略。列諸卷首。然後錄其所作。若樂府。若詩賦。若序記。書疏之屬。各以類分。而他邑之人。其文有爲東陽而作者。有附見一二。總若干卷。合而名之曰東陽文獻錄。蓋亦祖述潛溪二書而爲之者也。錄既成。公運又將鐫梓以廣其傳。而屬序諸首簡。予聞易之大畜曰。君子多識前言往行。以畜其德。而孟子言尙友古人者。亦必誦其詩。讀其書。而論其世也。今吾子蒐羅廢墜。抉剔幽隱。以成是錄。使東陽數百年文獻之懿。萃於目前。其用心勤矣。雖其間采摭之未

備。選取之未精。然古人嘉言善行。亦往往而在也。多識以畜其德。論世以尙其友。子之學知所務矣。所就其可量耶。又況是書之傳。使後之君子。亦於是乎畜其德。尙其友焉。則所以起其高山景行之思者。爲何如耶。吾知異時東陽文獻。又不但如今之所錄而已。孰謂其無補於世教也哉。故爲序之。

鄉賢祠志後序

古人祭有道有德者於警宗。又謂鄉先生沒而祭於社。則鄉賢之有祀尙矣。金華在故宋時。嘗祀梅節愍。宗忠簡。潘默成。三賢於學宮。祀東萊呂成公於麗澤書院。至元則又有四賢書院。以祀何王金許四先生。後遭兵燹。羣祠皆廢。我朝成化初。浙東僉憲辛公訪。謂東萊旣從祀孔庭。而四賢諱明道學。以續考亭之緒。其功尤大。乃奏立正學之祠。然宗潘諸公猶未及焉。弘治丙辰。浙藩參議湖南吳公旬宣所至。庶政時敘。乃考先志。修古典。謂茲文獻大郡。名公鉅儒。彬彬輩出。立德立功立言者。後先相望。殆不可縷指。而有道有德鄉先生之祀。僅若是焉。非缺典乎。宜有以舉其廢者。於時巡按侍御東廣吳公。觀風察政。洗冤澤物。適臨茲郡。聞公之議。亦謂其有補世教。弗可緩也。爰命有司。綜理其事。而同守薛侯敬之。剛敏有爲。志崇先哲。承命唯謹。以學宮地隘。弗稱妥靈。而卜地于郡城南隅。經斯營斯。不日就緒。公又以爲郡故多賢。弗可限之以三。而著錄於志傳者。累數百人。亦弗能通祀也。乃推擇其名德最盛者數十人。而尸祝焉。其已祀者。則仍其舊。間又雜取東萊四賢。及祠中諸公之遺事遺文。類而集之。以爲祠志。欲人之誦其詩。讀其書。而論其世也。其幸教吾黨之士者。何其至耶。旣乃命某識其末簡。嗚呼。疇昔吾婺稱小鄒魯。他郡莫

敢望而擬焉。夫何前修旣沒。徽音莫嗣。衰微不振者於茲百年。山川如故。風氣不殊。何古今人不相及耶。亦其世降俗流。未有以感發興起之耳。古之化俗導民者。非必其條教之詳。法令之嚴也。蓋有陰感默誘。神而化之。使自趨之之道焉。昔廬陵有四節一忠之祠。文丞相履善少嘗遊之。而欣慕曰。死不俎豆其間。非夫也。厥後文公果以精忠大節。著於天下。視前人益有光焉。非祠之所感而然乎。此待御與公所以汲汲於是也。後之人進而瞻於祠像。退而考諸祠志。遐想其人於數百載之上。必將有奮然於中。不能自己。而思所以俎豆其間者矣。若文公之爲者矣。孰謂諸公是舉。無關於風化也哉。雖然。祥有開而必先。運無往而不復。造化人事盛衰之理。往往相仍而行。百年曠典。一朝而舉。殆不偶然。得非吾婺將復宋時之盛。而天啓之乎。邦人君子。尙知勉哉。尙亦無負於天。無負諸公之望哉。

蘭谿縣志序

周官大司徒。職方氏。皆掌天下土地之圖。而又有外史掌四方之志。此後世邑郡之圖志所由始也。吾郡在宋洪遵有東陽志。元瞻思又有續志。皆統紀一郡之事。而於諸邑未暇致詳。故他邑亦皆各自爲志。獨蘭谿自唐咸亨始爲縣。歷宋元迄今八九百年。未聞有爲之志者。其疆域山川。民物貢賦。人材風俗。與政事之損益。吏治之得失。漫無登載。缺典甚矣。邑先正禮部吳公。嘗著敬鄉錄。略識前代碩儒。才士名卿。賢相之本末。而附以詩文。又取祠廟碑誌。及鄉飲進士題名等記。以存是邦之故實。庶幾可補邑乘之闕。而書又亡逸不存。可勝嘆哉。乃弘治癸丑。崑山王侯用檢來爲邑宰。蒞政之暇。欲考圖經。求故典。而不可得。

謂是邦爲浙東要會之區。素稱望縣。而文獻不足。若是。豈非爲政者之責乎。乃命庠士之秀者。分詣各鄉。訪遺老。詢故事。凡寺觀祠廟之壁題石刻。故家名族之志傳譜集。悉皆采摭以來。而屬前進士靖江令鄭君威甫。爲之詮次。予亦與焉。鄭君暨予辭不獲命。乃據洪瞻二志爲準。益以故所傳聞。新所未錄。參諸史傳。及先輩文集。中有及於縣事者。咸以類附。其目五十有六。釐爲五卷。草稿粗具。未及刪定。而王侯有召命。入爲臺察。其事遂寢。厥後西蜀許侯鵬舉。欲踵成之。而又不果。正德戊辰。丹徒許侯補之。始至。適值艱歲。撫綏靡暇。越再朞。而政成愛立。百廢具舉。爰謂昔人所爲有益於後人者。弗可以莫之繼也。乃取前稿。躬自校閱。重加審訂。而損益之。以成一邑之典。仍繪圖以冠其首。且將鐫梓以廣其傳。以予於是昔嘗與有力焉。俾述顛末。識歲月於其首。予惟是編之成。豈徒存故典。表先哲。以昭示無窮而已哉。將使後之觀民設教者。於是而求其故。以盡更化善治之道。論世尙友者。於是而稽諸古。以爲多識畜德之資。亦未必無小補焉。然非王侯創之於始。則後將何述。非許侯成之於終。則先將何傳。二侯之功。殆未可以優劣也。第區區輩學殖荒落。聞見寡陋。且生數百載之下。而欲考求紀述於數百載之上。文獻旣亡。無從取徵。而一邑之間。又未能如太史公之周遊歷訪。未免襲誤踵訛。舉一廢百。爲可愧耳。若乃窮搜博考。續而書之。以補其闕失者。端有望於後之君子。

鄉試錄序 戊午七月林愈憲求代考官作

吾儒爲天地立心。爲生民立道。爲往聖繼絕學。爲萬世開太平。其功用之大。何如哉。隆古帝王。莫不用儒。

爲治。若虞之論九德。舉黎獻。周之教三物。賓賢能。所用者皆儒也。故當其時。野無遺賢。王多吉士。庶政惟和。萬邦咸寧。治隆俗美。卓乎不可及焉。三代而下。儒者弗用。用者非儒。漢策賢良。而相曲學。棄醇儒。唐舉科進士。而重詩賦。輕明經。宋以經義八行取士。而元祐乾淳學術。乃見擯廢。無惑乎治之。不古若也。惟我聖祖。憲天立極。尊右儒術。誕興文治。建學育材。如古膠庠。命鄉論秀。如古賓興。以吾儒之道。具於易書詩禮春秋之經。孔曾思孟之書。而濂洛考亭諸儒。發明獨得其宗。故學校以之爲教。科舉以之取士。而不雜以他術。用儒爲治。未有若是其純者也。列聖承之。久於其道。而天下化成。故得人之盛。度越前代。太平之治。悠久無疆。非用儒之効乎。皇上繼統守成。於茲一紀。旁求儒雅。以共天職。亦旣三設科矣。弘治戊午。仍屬大比。賓興之秋。巡按浙江監察御史張某。謂進賢如不得已。可弗慎乎。乃與某等同寅協恭。以祛宿弊。而杜僥倖。抑奔競。議行場屋貫條。視昔加嚴。務欲選舉得人。副聖天子側席真儒之意。旣各公舉所知。走書幣。往徵某某。以典文衡。某亦齒焉。其就試者。悉由諸道憲臣。躬詣各屬。詢行考文。推擇以來。猶懼其濫。又會合諸司。覆考而沙汰之。可謂嚴矣。汰去之餘。猶二千幾百有奇。吳越之士。何其盛耶。迨入院。則某與某任提調。某與某任監試。考校文字。則某等分任之。諸外內職事。皆慎選其屬以充。而御史某總其成焉。衆皆精白一心。誓以將事。其圍棘三試。與取士之數。悉遵定制。已乃刻第其氏名。與文之醇正者爲錄。以獻於天府。而傳之天下後世焉。嗚呼。我國家建學養士。謂之儒學。設科取士。謂之儒科。教之以儒。而取之以儒。其望之厚矣。二三子旣登名是錄。以儒名於天下。行且捷春官。奉廷對。致用有日。其亦以宇宙內事。

爲吾儒分內事。而思所以立天地之心。立生民之道。開太平於萬世乎。所謂望之厚者。不在茲乎。某於諸士。得之言語文字之間。而文者儒之餘事耳。萬一有儒其言而不儒其行。儒其貌而不儒其心。甚至修於家。壞於官。失其所以爲儒者。寧不上負天子。下負所學也耶。某辱有場屋一日之雅。敢僭書首簡。用爲多士之規。

菊莊詩序

有爲軒岐之學者。伊廷玉氏。質良行淳。不競榮利。頗有韓康。宋清之風。其平生無他嗜好。獨於菊焉。玩而樂之。弗厭也。嘗卽所居之旁。治地爲圃。羅植甘菊。數千百本。根而培焉。苗而灌焉。條榦而整比焉。屏列焉。僕僕然不以爲勞。當其霜露始肅。寒英盛開。則攜賓友。引壺觴。朝夕嘯咏乎其間。若與爲知己者然。因名其所居之室曰菊莊。一時名勝。與凡縉紳君子之過其居者。往往爲之題咏焉。廷玉彙爲一帙。得古今體五七言詩若干。謁予爲序。予嘗觀於月令。爾雅。本草。仙經。以及靈均之騷。淵明之辭。鍾會之賦。子美。老泉。東坡之詩。石湖。劉蒙。史正志諸人之譜。而有以知菊之爲物。君子貴焉。彼其花於荒寒寂寞之濱。而黃中通理。介然高潔。不與凡卉同其盛衰。有儒之德焉。及其用於服食。則春採玉英。夏採容成。秋採金精。冬採長生。可使去疾。可使引年。爲餌之最良者。甚至南陽菊潭。飲其水者。壽皆百歲。則其利澤及人。又有儒之功焉。是非吾儒之流。與之同臭味者。其孰能好之。若廷玉。工於醫者也。宜其莊以藥名。而神農之三百六十五種。無不備焉。胡獨有取於菊而名其莊哉。豈其隱於方伎。有同於花之隱逸也耶。抑以其衛生之功。

將自擬於菊潭耶。若然。則廷玉之所得於菊者亦淺矣。彼爲醫者特一技耳。菊之爲道。豈一技而能盡耶。必其醫而儒焉。則進而醫國庇民。又將有大其功者。是乃軒岐之所以爲軒岐。而可以一技名哉。如是而比德於菊焉。庶幾無愧矣乎。廷玉其亦有志於是耶。嗚呼。三五而降。吾民之癢疴疾痛。天殤札瘥。弗能以壽其生者久矣。吾安得廣君之莊於天下。使人人飲菊水而養遐齡。若彼甘谷之老哉。故不辭而爲之序。

書北堂永秀詩卷後

弘治之季年。予被命承乏長南都太學。有廣南舉子趙生善鳴者。以母命來卒業焉。予見其貌恭而志篤。執經館下。質問所疑。弗明弗措。可與共學者也。進而問其世出。及所從游。則爲故宋宗室某之裔。大參李君士達之甥。曾受學於內翰陳公甫之門。其學固有自矣。一日請於予曰。善鳴母李氏。爲龍江望族。天性淑慧。幼聞諸舅兄讀小學諸書。皆能默領章句。諳其大義。在家而恪遵姆訓。逮歸而克脩婦道。不幸先君蚤喪。茹苦勤家。劬劬教子。必以義方。慈而有節。愛而知勞。故兄善和。以文著聲庠序中。而善鳴遂叨鄉薦。頗有成立。不替先緒。皆慈母之教也。大參舅氏嘗稱爲孟陶二母之匹。母年六十時。客有繪萱草圖爲贈者。因名之曰北堂永秀。諸舅及縉紳君子。皆爲賦詩以壽吾母。而今內翰湛元明。又爲序其事焉。善鳴彙次成帙。願賜一言。以表章吾母之善。垂諸不朽。庶幾少追不孝之罪也。予謝以耄荒不文。而生請之不置。今十年矣。予臥病窮山。生枉過焉。復申前懇。乃作而言曰。詩稱焉得萱草。言樹之背。蓋以萱爲忘憂之草。故室家相念者。欲樹於北堂以解其憂耳。未嘗言及於母也。神農本草謂萱名宜男。爲妊孕之所佩。故世

俗往往以萱喻母。而唐人萱草生堂陞。游子行天涯之詩。則又以萱爲子焉。人生有母。而壽考康寧。洩洩在堂。則子之憂所由忘。固若萱之秀於北堂矣。若其有子能賢。而行道揚名。以顯其親。則母之憂所由忘。是又爲不萱之萱也。母子交相爲萱。而並忘其憂。此人所深願而不可得者。今生能得之。固宜諸君子之嗟嘆不已。而咏歌之也。生之兄弟。繼今而往。蚤夜孜孜。講學修行。以成其身。若孟子之以道自任。而有功聖門。若陶侃之樹勳揚休。而有功國家。使賢母眞爲二母之匹。則北堂之秀。永永無疆。而非止爲一世之壽。其爲不朽。孰大於是。尙奚假於予言哉。生其勗諸。

吳烈婦詩序

自關雎之化熄。而閭巷之間。無復漢廣行露之風。自彤史之職廢。而閨門之內。不聞婦訓姆儀之懿。於是乎天理日微。人欲日熾。桑中濮上之音。延於天下。世道已駸駸而入於夷矣。陵遲至於有元之世。遂舉中國而夷之。上自王公。下而士庶。亂倫無別。禽獸其行。子烝父妾。兄收弟室。嫂治弟棲者。恬不爲恠。在彼固無足議。而廢三綱。墮五典。使先王衣冠禮樂聲明文教之地。悉淪於氍毹。髮腥羶污穢之域。其可哀也已。幸而天理之在人心。有不泯焉者。故裙襦之中。亦有能閑禮義。守貞操。不降其志。不辱其身。臨大節而莫奪。赴水火而如歸。若吾鄉吳烈婦者。豈夷習所得而變耶。蓋烈婦爲里人某妻。遭亂。與其夫倉皇避難。去家西行一里許。聞鼓噪聲。足弱弗能步。度不可免。乃謂其夫曰。君宜自脫禍。弗以妾爲累。夫曰。子將若何。烈婦曰。妾義不受污。惟有死耳。夫號泣不得已而舍去。旣而遊兵四集。將追及焉。適道傍有池曰梅塘。

水潔且深。遂投其身以沒。後數日。兵盡。夫蹤跡至其處。見烈婦屍浮池面。雖盛暑而顏貌如生。乃舉而葬焉。時歲戊戌之夏六月也。其後好事者聞之。爲傳其事。而薦紳能言之士。又從而歌咏焉。蓋亦秉彝好德之良心。有不能已者。今某之孫。以其文若詩。彙爲一帙。謁予而告曰。先人有美而弗知。不明也。知而弗傳。不仁也。吾將以是傳之子孫。俾無忘烈婦之訓。願丐先生一言以張之。噫。吾於是。有以見世道升降之機矣。昔辛有適伊川。見有被髮而祭於野者。曰。不及百年。此其戎乎。其後秦晉遂遷陸渾之戎於伊川。蓋天將變夏爲戎。而其人已先化爲戎也。今當胡運告終。皇明啓運之始。而閭閻一二女婦。已能自拔流俗。而趨乎禮義。豈非天意將興文明之治於今日。而有開必先者乎。異時國家采民風。被管絃。以比隆於二南之盛者。不有取於是耶。是又不但爲一人一家之美而已。故爲序而不辭。

書鄭氏慶源錄後 以下序譜

太末之墟。有大姓曰桂巖鄭氏。其先係出滎陽。厥後自歛來徙家於是者。蓋將十世矣。支分派衍。族大以蕃。衣冠文物。世有令人。其七世孫公勉。始以才胥。效用於時。三丞大邑。皆有能聲。嘗念上世家牒。毀於兵燹。而後人無以考其先也。乃命冢子晃。推其所自出。疏其所由分。詳其所可知。而闕其所不知者。著爲圖譜。名曰鄭氏慶源錄。以示族人。使咸知所以尊祖敬宗。收渙散。敦親睦之道。生而相慶。死而相弔。患難而相收恤。不至漠然相視如塗人也。其可謂知所務者矣。晃之卒也。厥弟侍御君昱。於予爲年友。雅相好也。間出此錄。暨諸名公所爲序跋。俾書其末。予聞鄭之爲望族也久矣。在唐有滎陽之七房。近世有浦陽之

義門。其世胄之貴。世德之美。何如哉。今桂巖之族。祖滎陽而隣浦陽。其家法固有由來矣。君之父子兄弟。傑然秀出於其間。松廳之遺愛。栢府之風裁。昭宣令聞。克允厥宗。所以馨馥譜牒。紹前美而裕後昆者。將不在茲乎。彼詩書禮義之習。孝友睦婣之行。承珪襲組之華。滎陽浦陽之先。所以昌其族也。君以是倡之。後之人其無奮然而興起者亦乎。安知桂巖之不爲滎陽浦陽哉。鄭之子孫。觀斯譜者。其勉之。不然。則永州之鐵爐步。人將有議其後者矣。

重修青陽陳氏族譜序

予舊僚陳君弘載。以書來曰。某之先。出於帝有虞氏神明之胄。自周武王封胡公滿於陳。以備三恪。陳亡而子孫散處四方。以國爲氏。梁天監中有諱元之者。爲廣德司理參軍。始自蒲亭徙家麻姑山之東。太南鄉。其玄孫曰吉甫。仕唐爲青陽務稅使。又遷於九子山之社溪。八世而潛江令太祿。爰遂定居邑中。又十五世而九華山人諱巖。以詩鳴於宋。又二世而元池州學正諱祖生。以儒名家。蓋某之曾大父也。池州季子諱貞。於某爲大父。仕皇朝。歷蘇贛二府同知。皆有治聲。後以詿誤。左遷儋州而道亡。門戶日替。先君子熒熒孤立。洪武末。又以事謫戍滇南。而青陽之宗祀絕矣。先君雖流離兵間。日不暇給。而飭躬礪行。思亢厥宗。凡所以爲光前裕後之圖者。靡所不至。嘗以家牒更世變不存。懼後人之迷厥所自也。乃卽其耳目所及知者。自九華山人而下。爲譜以示子孫。而於不能記憶者。則闕焉以俟。嘗謂某曰。吾先世自唐以來。家於青陽。世德之美。世胄之貴。甲於他族。而今遂泯焉。吾之罪也。一杯麥飯。何時歸灑松楸乎。小子勉諸。

某泣而識之。不敢忘。居無何。而先君奄棄諸孤矣。其爲悲痛。可忍言哉。不肖孤。今承遺教。罔敢失墜。幸以科第起家。竊祿於朝。先君以恩贈南京刑部主事。曩因謁告歸滇南。燎黃。遂如青陽。展掃先隴。而先人敝廬。則已鞠爲茂草矣。乃卽其地而築室以居。不敢去墳墓也。間又訪於鄉之父老。得故族譜。自青陽稅使而下。凡二十有二世。遂因先君所述。重加纂輯。參以所聞。正其訛謬。用史氏年表之例。列其昭穆世次。與夫官爵名行之懿。著爲陳氏世譜一帙。成先志也。子盍爲序。以訓吾之後世。使知所以尊祖敬宗。崇德象賢。而興起其孝弟之念。以無愧於神明之胄。不亦善乎。予於陳君之言。竊有感焉。今世之姚虞陳田其氏者。孰不自以爲神明之胄也。然舜爲法於天下。可傳於後世。而我猶未免於鄉人焉。不有忝於神明也耶。君之譜其族者。意有在矣。君蚤以明經登第。入典邦刑。出持憲節。有猷有爲。昭宣令聞。而又能繼志述事。使前人之緒。旣絕而復續。先世之譜。旣失而復完。是則孝之大者。固足以匹休於前聞人矣。豈直自異鄉人而已哉。然欲稱其爲神明之胄。則又有大於是者。詩不云乎。毋念爾祖。聿修厥德。蚤夜以思。去其不如舜者。而求所以爲舜者。斯可矣。斯固君之志也。君以是倡之。後之人。其無奮然而興起者乎。傳所謂八世之後。莫之與京。必有當是占者矣。爲陳氏之子孫。尙勗之哉。是爲序。

清塘賀氏重修宗譜序

永新賀先生宗濬。受易於保齋劉文安公。以進士乙科。歷魚臺應天司訓。而主教事於吾邑。辱與游最厚。旣而以病免歸。將施其有政於家。以爲孝莫大於尊親。尊親莫先於明譜系。以究其源之所自出。序昭穆。

以別其派之所由分。夫然後倫理可正。恩義可篤。而家可齊也。乃取其故所藏家牒而重修之。以增益其所未備。凡當代名公之文若詩。有爲賀氏而作者。悉彙次以附其後。將以示諸後人。俾咸知所以賢賢親親。而起其油然而孝弟之心也。其亦可謂知所務者矣。間使其子位。持以過予。而屬爲之序。予觀譜之所述。自文堂府君始。自廬陵徙居禾川之清塘。逮今十有餘世。其先德之懿。有以忠厚傳家。積累有素稱者。有以詩書之澤。過於他族稱者。或好學而尙文。或介潔而尙義。具於學士解公大紳。方伯李公昌期之序者。詳矣。所以啓其後人者。亦無不至矣。予何人斯。而敢以蕪陋不斐之言。贅其間哉。辭之再四。而位之請不置。且先生之意。不可以虛辱也。姑卽二公之所引而未發者。申告之。古君子之不忘其先者。非修其譜之難。而修其身之爲難。詩不云乎。無念爾祖。聿修厥德。又不云乎。夙興夜寐。無忝爾所生。爲賀氏之子孫者。誠知勤學厲行。以修其身。使夫詩書忠厚之澤弗墜。介潔尙義之風愈敦。則庶乎能念爾祖。不忝其所生矣。若能進而上之。爲賢爲聖。或以道德。或以文章。或以勳業。著之當時。傳之後世。足以光昭其先。若巽齋之自爲歐陽。以無負乎二公之所期者。不尤爲斯譜之榮矣乎。先生之所以譜其族者。將不在於是乎。其或身之不修。而惟譜之修。則永州之鐵爐步。人將有議其後者矣。爾子爾孫。觀斯譜者。尙其念哉。

三山雲程林氏族譜序

浙江僉憲三山林廷珍。行部之暇。過予話舊。因出其所修家乘一編。而告之曰。某之先。由晉黃門侍郎穎之子祿山。以散騎常侍出守晉安。因而家焉。其後世居西關。當元之季。有諱比者。仕爲鎮撫。嘗領兵守禦。

南關屢抗強寇。不幸羣盜四集。攻陷城邑。力弗能支。衆皆款附。而公獨守義不回。闔門就屠。僅遺一子曰陽。文身避難。竄於城西之馬鋪。而黃門之祀。賴以不絕。蓋吾之曾祖也。曾祖之昭二人。而吾祖爲之長。乃徙於雲程。而再植有家。吾祖與從祖之穆四人。而先君又爲之長。尤力於爲善。而克昌厥後。逮吾則昆弟七人。從父昆弟四人。從祖之昆弟一人。凡十有二人焉。暨吾昆弟之子若孫。抑又衆矣。先君嘗進某兄弟於學。欲其有所成立。以亢厥宗。某等奉承遺教。罔敢失墜。幸與弟塘。皆起家進士。而玠與從弟璿。璿又皆以明經。後先領薦於鄉。今某由尙書刑部郎官。來僉憲事。塘以行人爲雲南道監察御史。璿由乙榜爲山東寧海州學訓導。而先君亦以恩贈官南京刑部主事。皆吾祖宗餘慶之所鍾也。吾敢忘其所自乎。第惟先世厄於兵禍。家牒逸亡。自晉安而下。遷徙世次。皆莫能詳。其爲悲痛。可忍言哉。茲錄其所可知。著爲圖譜。附以家規。將以傳之來世。俾永永弗忘。吾鎮撫公忠義之訓焉。子其爲我序之。予昔宦遊閩中。辱與君有斯文之雅。誼不得辭也。乃觀其譜。而僭爲之言曰。嗚呼。仁者必有後。蘇文忠公嘗有取於申包胥。天定之說。吾於林氏。蓋有徵焉。昔商三仁。少師比干。以諫紂死。其子堅。避難長林。因以林爲姓。而周武王封之清河。厥後如雍。如楚。如不狃。皆以名節見魯春秋。而放之問禮孔門。名德尤著。至臯父子。又以十德有聞於趙。則堅之有後。非以少師之仁。而天定之足徵者乎。自晉馬南浮。而林黃陳鄭四姓。實始居閩。更歷唐宋。以迄於今。諸林之族莫盛焉。其他固未暇論。姑以君之所自出者言之。若鎮撫公之事。雖名位素微。不登史傳。而一念之烈。殺身成仁。亦可謂能繩祖武者矣。其子之文身避難。實類於堅。雖在當時。不有清河

之封。然不數世而有君之兄弟。傑然奮出其間。抑豈非天監其仁。俾之有後者。於是而始定耶。雖然。少師與鎮撫公。遭時不幸。不過著其一節之仁。而天之祐其後者。已若是焉。而況於稷契周召之徒。能大其仁。以及於天下後世者乎。今君之兄弟。崇德象賢。際時休明。執法內外。得行所學。非彼所遭之不幸者也。尙其夙夜懇篤。不忘益充其仁。左右吾君於唐虞三代之盛。以爲今之稷契周召焉。則其後世之瓜瓞綿綿。日昌日熾者。可量也耶。然則斯譜之作。後之君子。又將以徵天道之大定焉。君之兄弟。其可忽哉。君之嗣人。其亦敬念之哉。庸書諸首簡以俟。

跋方氏族譜後

譜者一家之史也。國有史。則其君之明暗。臣之忠邪。政之是非得失。善可法。惡可戒。昭昭於後世。族有譜。則自大宗以及小宗。其人之賢愚貴賤貧富。一覽具見。雖不若史氏之褒善貶惡。而勸懲之意。固未始不存乎其間也。新安方氏。自譜其族出於神農氏之胄。肇自得姓以迄於今。上下數千餘年。傳序幾二百世。其諱字生卒。與其官封里居。歷歷備載。雖古人所闕疑而不敢知者。一皆蒐撫無遺。用心亦甚勤矣。吾未暇置吾喙也。第謂族以人而榮。亦以人而辱。八元八愷。世濟其美。固有光於辛陽之族。而窮奇渾沌之凶。所以玷厥宗者。不旣多乎。吾觀方山采芑之勳業。河南洛陽之治行。鑑湖之高尙。蛟峯之倫魁。秋崖萬里之文章。馨馥譜牒。輝映古今。足以起人瞻敬。方氏之榮。其在是也耶。使其族無若而人。而徒侈遙遙之華胄。雖貴且富。適足以穢彼家乘耳。何取哉。吾故曰。譜者一家之史也。爲方氏之子孫。睹斯譜者。尙思所以

亢厥宗哉。

李氏族譜序

並

武緣李君璧以進士乙科署教事于吾邑。好學能文。而操行謙謹。士林皆愛重之。一日訪予山中。出其所修家譜一帙。而告之曰。某之先世居武緣之五鳳嶺。故老相傳。自象州來遷。荐罹兵燹。圖譜失傳。五世而上。雖墳墓具存。而支派行序。漫無可考。今族人之衆。派分爲四。自國初以來。各立戶版。雖究其所由分。而婚喪災患。猶相慶弔。前人蓋未有顯者。家君始仕爲潮陽北山驛丞。慮後人之迷其先也。嘗命某曰。謹家牒而不忘乎先。孝之大者。汝其勉之。某因記其所可知。而闕其所不知者。斷自某公而下。凡若干世。具列爲圖。而生年卒葬。備書於下。其戶版之異者。則別爲圖。以附於後。弗敢以強合焉。姑以敍昭穆。別親疎。不忘其所自出耳。若欲如唐人之譜學。自受氏以來。皆有可考。則固難矣。願先生一言。以示吾之子孫。族人使知一本之義。而起油然而孝悌之心也。予聞先王有大小宗之法。以聯其族。故彝倫攸斂。而禮義興行。風俗淳美。後世莫能及焉。自王教衰。宗法壞。人不知所本。而各顧其私。雖親骨肉。亦相視如塗人。情義乖離。而彝倫斁矣。所以聯其族屬。合其渙散。而使之相親睦者。惟譜牒之脩。爲有補於世教耳。彼不知所重者。固忽此而不講。間有知務乎此。而或冒華胄以爲榮。若求附城南之杜。妄拜汾陽之墓。不祖其祖。而祖他人。牽合附會。以自誣者。徒以貽笑取譏而已。惡在其爲譜哉。今君之爲是譜也。質而不誣。遠不援貴。近不遺賤。使人有所傳信。固已得古人之遺意矣。然旣聯之以譜牒。尤必敦其雍睦之行。尊尊而親親。老老而

幼幼歲時爲酒食以浹其歡。胥教誨以匡其失。貧而相收。患而相恤。疾病死喪相扶持。相賙助。而不有途人之視。使子孫族人有所觀法。則孝弟之心。豈不油然而生。而有引弗替乎。君其勉乎哉。又卽此義而充之。天下之生。莫不有族。秉彝良心。誰獨無之。君之職爲國家司教化者也。能以己之所欲立而立人。啓迪開導。使凡有族者皆來取法。則人人各親其親。各長其長。而天下爲一家矣。先王宗法之意。殆將復見於今日。此又予之所深望也。君其勉乎哉。

古城伊氏宗譜序

先輩有言。爲常人之子孫非難。而爲名人之子孫者難。爲名人之子孫固難。而爲聖賢之子孫尤難。蓋以前人之功德極盛。而後人不克肖焉。則未免辱其先矣。斯所以爲難也。湯溪有伊廷玉者。以醫名家。而好尙文雅。喜交結賢士大夫。得其詞翰。則珍藏寶愛。時取而玩誦之。以爲樂。又嘗慕淵明之風。治圃庭前。品植佳菊。以娛晚節。其亦可謂曠達而不俗者矣。一日持其家乘一編。過予而言曰。吾伊氏上世相傳。皆謂出於阿衡伊尹之後。而自陟以下。世本無存。經傳不載。無從攷證。固未敢以爲必然。但孟子謂伊耕莘野。呂氏春秋謂尹居伊水。書言朕載自亳。而其葬也。亦在於亳。其地在中州。而吾之先人。世家于汴。郡著陳留。與伊莘亳都壤地相鄰。則所傳或有可信者。疑以傳疑。亦不敢棄而不錄也。自商而下。迨于周漢。以及晉唐。二三千年。伊氏未聞顯人。至宋中葉。吾遠祖有運使公諱概者。隨駕南渡。始自汴而來。寓居嚴陵。而運使之玄孫諱恭者。在前元至大間。爲尉於龍游。樂其山水之勝。土田之沃。又卜居邑東之古城。厥後古

城之地。析屬湯溪。故今爲湯溪人。然自縣尉以來。又經十餘世矣。門戶日昌。生聚日衆。支分派別。析爲三族。有上伊中伊下伊之稱。而下伊又有析居蘭源者。成四族矣。吾則下伊之後也。嘗念四族之衆。日疎日遠。而情義乖離。至有漠然相視如塗人者。甚爲可懼。吾季父某。與從兄。皆欲爲譜以維係之。而纂次未就。今成其志。特命從子薰。記所傳聞。而原其所自出。列其宗派。而推其所由分。又取法於歐蘇。闕其不可知。而詳其所可知者。凡吾族人之名字。世行年壽。葬娶。與其行事。一一備錄爲書。以傳于家。願得一言。序諸首簡。以教吾之子孫。使咸知一本之義。而尊尊親親。起其油然而孝弟之心。爲幸大矣。予惟伊尹以聖人之任。左右商王。以道覺民。而能使君爲堯舜之君。民爲堯舜之民。所謂上醫醫國者也。而論道之暇。又取神農本草。製爲湯液。以療萬民之疾。使天下疲癯殘疾者。無一人不被其澤。則不惟醫國。而兼盡醫人之伎。其仁覆天下如是。則爲之後者。欲象其賢。豈非所謂尤難者乎。君之先翁。擇術爲醫。其意美矣。至君昆季。而術業益精。聲稱籍甚。頗能得其一伎之良。而有功於人。庶幾能繩祖父之萬一矣。君又使諸從子。進業爲儒。藏修泮水。明經修行。志伊學顏。而彬彬可觀。異時進用於上。以行其堯舜君民事業。則醫國之功。又將歸於君家。不但爲一伎之良而已。書所謂率乃祖攸行。予切有望於伊之後人焉。嗚呼。其念之哉。

郭氏家譜序

郭本姬姓。傳稱出於文王二弟。虢仲虢叔之裔。初封于虢。而訛音爲郭。春秋所書郭公是已。其後以國爲氏。若魯之重。燕之隗。漢之伋。與秦。魏晉之嘉與璞。累朝皆有顯人。惟唐之尙父汾陽王子儀爲最顯。吾邑

諸處郭氏皆祖太原獨邑署西北中和坊一族素稱汾陽郭氏比屋而居羣從子姓衆逾千指其人皆豪俠俊偉而有材幹雖未嘗務學讀書而好文雅重義氣不肯降屈於人不爲苟賤之行蓋其氣習然耳其宗老曰某子婦弟也一日持所修家乘一編過予而言曰吾家故老相傳謂上世居華州將相鄉自汾陽始昌厥家昆弟子孫以數十計皆爲貴宦而第六子曰曖者與二子二孫皆尙公主其女又爲太后元勳貴戚奕奕門闥與國同休其世德之美世胄之榮天下莫與倫焉厥後唐室衰微遭黃巢之亂而曖之六世孫曰太初始自北來南居溫州平陽之錢浦而太初之孫起辛爲海東權鹽提舉又徙居天台其子曰滔以儒生教授東陽因家于長衢歷世茲久浸爲鉅族迨元前至元中又因台寇楊鎮龍爲變擾及東陽族衆逃散其十世孫曰曾三提轄者始來居于今所亦且幾十世矣今吾族人生聚日衆長幼親疎混淆相處而交瘵閭墻不以爲恠吾恐其日疎日遠而漠然如途人也甚爲可懼屢欲爲譜以聯其族焉而室居廛市地窄人稠荐罹鬱攸之禍前代圖譜燬失無存閒有傳錄一二亦殘缺失次矣爰命子姪祚等特往長衢故居訪問遺族始得前代傳序世次之詳及屢經遷徙之故與故老所傳者相合乃輯爲斯譜以傳于家願賜一言敍之以訓吾子孫族人使皆知尊其所自出親其所同出興孝興弟不至途人之視是亦先生德教之所及也予謂君之爲譜而不忘所自固善矣若爲人後而不思取法前人以象其賢亦奚以譜爲哉昔唐史臣稱子儀功蓋天下而上不疑位極人臣而衆不疾先儒謂其何道能然惟仗忠信安義命而已夫功蓋位極前代名將相亦多有之惟不疑不疾則自伊尹孔明而下罕有及焉忠信義命四

字人孰不知。亦非甚高難行之事。而仗之安之。則非大賢君子不能。子儀克盡是道。故能再造唐室。而夷狄歸仁。強藩服誼。亦奚止於上之不疑。衆之不疾也哉。宜其位祿名壽。萃於一身。而善始善終。流澤餘慶。裕於後昆。而愈遠弗替也。今諸君爲汾陽之後。非修其譜之難。而修其德之爲難。苟能躬行以率其子孫。蚤夜孜孜。求汾陽之所以爲汾陽者。而取法焉。存心一主乎忠信。而不爲欺妄。制行必安於義命。而不圖僥倖。則雖未能建功立業。以匹休汾陽。而以是行於鄉。不失爲鄉之善士。又以是出而事君。亦可爲國之薰臣。而不辱其先矣。詩曰。無念爾祖。聿修厥德。傳曰。公侯之子孫。必復其始。予於汾陽後人。切有望焉。不然。則未免爲永州之鐵爐步矣。其念之哉。

